

NO LUUKA YOTTINIRI LINJIILA ON NON

Hunorde

¹ Bay woodiino yimbe d'uuđube, nangannoobe wallifagol fillayeeji fii piiji feyyunoodi hakkunde men, ² wano bee tawanoobe gila ka fuđdoode yottinirnoo non e men, ben seeditorbe gite mun, wonti kurkantoobe daaluyee on, ³ min kadi mi taw no hawranimmi, yo Tawaafilu teddudo, tip-pude e koo ko mi tefi, mi fensiti gila ka fuđdoode, weebitirangol on d'un bindudi rewrundi, ⁴ fii no andiron pellital wongal ngal e nder d'i janndeeji di jannadon.

Fii Fejninannde Jibineede Yaaya

⁵ Fewndo *Heroodu laaminoo diiwal *Yahuuda ngal, wooduno *yottinoowo sadaka wi'eteedo Zakariyaa'u jeyaado e mojobere oo wi'eteedo Abiiya. Sonna makko ko e lepol *Haaruuna jeyaa, on no wi'ee Elisabaatu. ⁶ Be d'idoon non ko be feewube yeeso Alla, awa kadi hibe jokkunoo yamirooje e sariyaaji Joomiraado on e baawo feloore. ⁷ Kono tawi be maraa bidđo, bay hari Elisabaatu wonaa jiidotoodo, awa kadi mo kala e mabbe nawyii.

⁸ Tawi non e nder ko kanko Zakariyaa'u o gollaynoo golle yottingol sadakaaji ka Alla, d'un ko fewndo ko mojobere makko nden ardinaa yottingol sadakaaji, ⁹ o toddorano urba tippude e naamuuji mabbe kambe yottinoobe sadaka

ben naatugol ka nder juulirde Joomiraado on, fii ittugol sadaka urngallooji sunneteedi. ¹⁰ Fewndo on saa'i ittugol sadaka urngallooji, tawi jamaa on fow no juula ka yaasi.

¹¹ Ko fewndo on saa'i malaa'ikaajo Joomiraado on feepjani mo, no darii ka jaamo ittirde sadaka urngallooji. ¹² Bay Zakariyaa'u yi'ii on malaa'ikaajo, o dennyii, o huli. ¹³ Kono malaa'ikaajo on wi'i mo: «Wota a hulu, yo Zakariyaa'u, ko fii toraare maa nden jabaama. Sonna maa Elisabaatu jibinante boobo gorko, a innay on Yaayaa. ¹⁴ O wonane welo-welo e weltaare, awa kadi yimbe buy weltoray jibinegol makko, ¹⁵ sabu o wonay aaden mawdo yeeso Joomiraado on. O yaroytaa njaram mandilinaydan e kala ko caakinta. *Ruuuhu Seniido on wonoyay e makko gila ka teege yumma makko, ¹⁶ awa kadi o artirobay *Banii-Isra'iilayankeebe buy e laawol Joomiraado on, on Alla mabbe. ¹⁷ O yaaray yeeso Joomiraado on e nder ruuhu e doole wa Iiliya, fii no o artira berde baabiraabe e telen-ma bibbe mun, o artira murtube ben e telen-ma faamu feewube ben, e fii no o ebbirana Joomiraado on jamaa hebulaniido mo.»

¹⁸ Zakariyaa'u wi'i malaa'ikaajo on: «Ko honno d'un henirantammi? Ko fii mi nawyii, awa beyngu an kadi wonii nayeejo.»

¹⁹ Malaa'ikaajo on jaabii mo: «Ko min woni Jibriilu, darotoodo takko Allaahu on. Ko mi imminaado fii yewtugol ma, humpite oo kibaaru moyyo. ²⁰ Jooni, a mbobiday, a waawataa wowlude doo e d'un laataade, sabu a hoolaaki dii kongudi an laatoytoodi e saa'i happaado on.»

21 Tawi non jamaa on no habpii Zakariyaa'u, hibe jibii ko hondfun neebini mo ka nder *juulirde mawnde ton. **22** Bay o yaltii, o waawaali be yewtude hay fus. Be ndaari, be tawi o fejninananaama ka nder juulirde mawnde ton. O woni e ebbirangol be juude, o lutti mbobidude.

23 Bay nalaadfe makko yottingol sadakaaji d'en timmii, o yiltitii ka suudu makko. **24** Bay feyyii e d'un, sonna makko Elisabaatu yetti reedu. O suuditii e nder lebbi jowi, himo wi'a:

25 «E hino ko Joomiraado on wadanimmi kon,
o yeeyitike lan jooni,
o ittanii lan kaa hersa
ka mi wondunoo e hakkunde bee
yimbe.»

Fii Fejninannde Jibineede Iisaa

26 Ka lewru jeegašuru, Allaahu on nuli oo malaa'ikaajo wi'eteedo Jibriilu e ndee saare Naasirata jeyaande e ngal diiwal Jaliilu **27** haa e oo jiwo wi'eteedo Mariyama, mo gorko wi'eteedo Yuusufu jeyaado e bolondaa Daawuuda yami. **28** Malaa'ikaajo on naati ka on jiwo, wi'i: «Mi salminii ma, an oo yedaado sulfu. Joomiraado on no wondi e maa.»

29 Ngol kongol jibi mo, o mijii ko hondfun e salminaango nii. **30** Malaa'ikaajo on wi'i mo: «Wota a hulu yo Mariyama, sabu a hebii sulfu immorde ka Allaahu on. **31** Awa a yettay reedu, jibinaa boobo gorko, innoyaa mo Iisaa. **32** O wonay mawdo, o noddiree Gedal Jom Bural on. Allaahu Joomiraado on jonnoyay mo jullere laamu maama makko Daawuuda nden. **33** O

laamoyo suudu Yaaquuba ndun haa poomaa, awa kadi laamu makko ngun lannataa.»

³⁴ Mariyama wi'i malaa'ikaajo on: «E ko honno dun laatorta, bay mi andaali gorko?»

³⁵ Malaa'ikaajo on jaabii mo, wi'i: «Ruuhu Seniido on aray e maa, bawgal Jom Bural on d'fuwirte^a dowdi mun ndin. Ko d'un si booboo *seniido heboyteedo on noddiroyte *Biddo Alla.

³⁶ Jooni non, Elisabaatu oo musiddo maa ko sowiido, o sowike kanko kadi e nder nayeewu makko booboo gorko. On wi'anoodo jiidotaako no e nder lewru jeegaburu mun ³⁷ sabu alaa ko Allaahu on ronki.»

³⁸ Onsay Mariyama wi'i: «Min ko mi kordoo Joomiraado on. Yo woniranana wano wiirudson non.» Onsay malaa'ikaajo on yahi.

Fii no Mariyama Humpitoroyi Elisabaatu

³⁹ E nder d'en balde d'on, Mariyama immii no hepii yahugol e saare goo ka hoore pelle e nder ndii leydi bolondaa Yahuuda. ⁴⁰ O naati ka suudu Zakariyaa'u, o salmini Elisabaatu. ⁴¹ No Elisabaatu nanirnood salminaango Mariyama ngon, bidso makko on memminii ka nder reedu makko, kanko Elisabaatu o heewi Ruuhu Seniido on, ⁴² o ewnii ko tiidi, o wi'i: «An ko a barkinaado e hakkunde rewbe ben, awa kadi bidso mo saawudsa on ko barkinaado! ⁴³ E ko honno mi newniranaa yo yumma Koohoojo an on seeno ka an. ⁴⁴ No hito salminaango maa ngon naatirnood salminaango maa ngon naatirnood ka noppi an, booboo mo mi saawi on memminii weltaare ka reedu an.

a **1:35** 1.35 Maa: «d'fuhirte».

45 On hooliido ko Joomiraado on fodi d'un kon
ko laatotoofun, haray ko malaado!»

Beytol Mariyama ngol

46 Onsay Mariyama wi'i:

«Wonkii an kin no manta Joomiraado on.

47 Ruuhu an on no weltanii Allaahu on,
on Dandoowo lan,

48 bay o liiyii giifse makko d'en e ndee lo'ere an
min oo kordso makko.

Ko d'un wadi, gila hande kala jamaanu
aroyayngu
wi'oyay ko mi barkinaado,

49 bay Jom Bawgal on wadfanii lan piiji mawnudi,
innde makko nden ko hormorteende.

50 Awa kadi yurmeende makko nden no layude
e hoore ben hulooþe mo,
gila e jamaanu heþi e jamaanu.

51 O golliri doole jungo makko ngon golle mawde.
O saakiti ben wadube e berde mun mijooji
townitaare.

52 O jippini ben marbe doole ka julle mun laamu.
O townri lo'ube ben.

53 O harniri weelaabe ben piiji moyyi.
O radii aldfube ben juude mehe.

54 O faabii *Isra'iila'en, ben jiyaabe makko.
O anditi fii yurmeende makko nden,

55 wano o fodirnoo maamaabe men ben
e Ibraahiiima e jurriya mun on non haa
poomaa.»

56 Mariyama wondi d'on e Elisabaatu e nder lebbi
tati. Onsay o yiltitii ka makko.

Fii Jibineede Yaayaa

⁵⁷ Bay hewtii ka Elisabaatu jibinta, o jibini booboo gorko. ⁵⁸ No kawtalbe makko ben e sibbe makko ben humpitornoo nden yurmeende nde Joomiraado on yedi mo, be weltodi e makko.

⁵⁹ Ka nallal jeetatabal, be ari *sunningol booboo on, be faalaa mo innitirde ben makko Zakariyaa'u. ⁶⁰ Kono yumma makko yetti haala kan, wi'i: «Oo'o, ko Yaayaa o innetee!»

⁶¹ Be wi'i mo: «Hay gooto e musibbe maa ben innaaka nden innde don!»

⁶² Be landori ben booboo on ebbirangol mo juude fii andugol ko honno o innata booboo on.

⁶³ Zakariyaa'u torii alluwal, o windi don: «Ko Yaayaa o innetee.» Onsay be fow be ɻaldfi.

⁶⁴ Don kisan, o hetti hunduko makko kon e ɻenngal makko ngal, o wowli, o jarni Alla.

⁶⁵ Onsay yimbe kawtal ngal fow huli, awa kadi kodooli wondi ka hoore pelle Yahuuda din fow hollondiri fii kon ko wadi don. ⁶⁶ Kala nanudo dun mijjii e bernde mun, wi'i: «Ko hondun oo booboo laatotoo?» Tawi bawgal Joomiraado on no wondi e makko.

Beytol Zakariyaa'u ngol

⁶⁷ Bay Zakariyaa'u ben booboo on heewii Ruuhu Seniido on, o woni e haalugol ko o longinaa, o wi'i:

⁶⁸ «Mantore wonanii Joomiraado on, on Alla Isra'iila'en,
e nder ko o faabii o sotti jamaa makko on kon.

⁶⁹ O yedii en Dandoowo mawdō
e nder nduu suudu Daawuuda, on jiyaado makko

- 70 wano o daalirnoo e kundule annabaabe makko
 laabuþe ben
 gila e duubi feyyunooodi,
- 71 hisingol en e juude aybe men e kala ajube en.
- 72 Ko nii o yedirnoo maamiraabe men ben
 yurmeende,
 o anditi *ahadi makko seniindi ndin,
- 73 dñun ko woondoore nde o woondannoo ben
 men Ibraahiima nden
- 74 fii jattingol en e juude aybe men ben
 e newnangol en rewugol mo e baawo kulol
- 75 e nder laabal e peewal yeeso makko,
 e nder ngurndan men dan fow.
- 76 An-le oo boobø, a innete annabaajo Alla Jom
 Bural on,
 sabu a hikkanto Joomiraado on yeeso
 fii moyyinangol mo laawi makko din,
- 77 fii no o andinira jamaa makko on wonde
 ko yaafuyee junuubaaji mabbé din o yedirta
 be kisiyee,
- 78 ko fii Alla men on ko heewuso yurmeende,
 dñun ko nden nde o imminirani en ndaygu
 immorde ka dow
- 79 fii ndayginangol wonbe ka niwre ben
 e ben joofiibe ka dowdi mayde
 e fii ardagol en e laawol buttu.»
- 80 Paykun kun njandfi, ruuhu makko on kadi tiidi.
 Ko ka wulaa o daakinoo haa jande o feepannoo
 *Banii-Isra'iila'en.

2

Fii Jibineede Isaa
(Mat. 1.18-25)

¹ E nder d'en balde don Awgustu lando mawdo Roomu on yamiri winditagol laamateeri makko ndin fow. ² Fewndo nden winditannde aranere, hari ko Kiriniyyu woni ko halfinaa ardagol leydi Sirii ndin. ³ Mo kala winditorayno ka saare mun.

⁴ Yuusufu kajun kadi iwri ka diiwal Jaliilu e ndee saare Naasirata fii yahugol ka diiwal Yahuuda, ka saare Daawuuda wi'eteende Bayti-Lahiimi, bay hari ko o jeyaado e nder feynguure Daawuuda nden, awa kadi ko e ndun suudu o jeyaa, ⁵ fii no o winditodira e Mariyama on yamaado makko, tawi on ko sowiido. ⁶ Fewndo be wonnoo d'on, saa'i ka Mariyama jibinta hewti. ⁷ O firtii dikkuru makko ndun. O buumi mo e wudere, o wallini e nder kunnawal namminirgal daabeeji, bay hari be hebaali werde ka suudu hobbe.

Fii Hakkunde Malaa'ikaabe ben e Ngay-naakoobe ben

⁸ Tawi e on jemma, no woodunoo e ngal diiwal don ngaynaakoobe daakinoobe fii aynugol gureeli mun din. ⁹ Malaa'ikaajo Joomiraado on feepani be, annoora Joomiraado on jalbini nokkuure ka be woni d'on. Be huli fota. ¹⁰ Kono malaa'ikaajo on wi'i be: «Wota on hulu, sabu mido fejnjinande on Kibaaru Moyyo mo welo-welo moolanaango wonanayngo jamaa on fow. ¹¹ Hande e ndee saare Daawuuda, on dapanaama ton Dandoowo, on-le ko *Almasiihu on, ko kanko woni Joomi on. ¹² Awa seedee mun, on taway boobo penu no buumaa e nder wudere, wallinaa e nder kunnawal.»

¹³ No o gaynirnoo wowlude d'un, d'on kisan konu malaa'ikaabe moolanaangu tawti malaa'ikaajo on, no manta Allaahu on, hibe wi'a:

¹⁴ «Mangural wonanii Allaahu on ka kammu, buttu wonii e oo aduna, hakkunde ben be o wadani sulfu makko on!»

¹⁵ Bay malaa'ikaabe ben yentii, ngaynaakoobe ben wi'indiri: «Mahen Bayti-Lahiimi ndaaroyen ko wadi ton kon, d'un ko koo ko Joomiraado on andini en fii mun!»

¹⁶ Be yahi hepa, be tawoyi Mariyama e Yuusufu ton, tawi boobo penu on kadi no wallinnaa ka nder kunnawal. ¹⁷ Bay be yi'ii mo, be fillitii ko be wowlananoo kon fii on boobo. ¹⁸ Kala nanunoobe ko ben ngaynaakoobe yewtaynoo kon wontiri d'un ɣalaw. ¹⁹ Mariyama mari d'un fow ka bernde mun, maanditii fii miijitagol. ²⁰ Ontuma ngaynaakoobe ben yiltitii, hibe manta mawnina Allaahu on fii kala ko be nanunoo e ko be yi'i wano be wowlirananoon non tigi.

²¹ Bay balde jeetati d'en timmii, o sunninaa o innaa Iisaa, innde nde malaa'ikaajo on toddfaninoo boobo on nden ado neene makko saawude mo.

Fii no Iisaa Weebitiraa Yeeso Joomiraado on

²² Bay jalaade fii la binagol mabbe ngol timmii, wano Sariya Muusaa on wiirunoo non, be nabi boobo on *Yerusalaam fii weebitangol mo Joomiraado on, ²³ (wano windori non ka Sariya Joomiraado on: «Kala boobo gorko afo on

ka neene mun ko Joomiraado on jeyi.»),^b ²⁴ e fii ittugol sadaka legetereeji didi maa gabooji kecci didi wano wiiranoo non ka Sariya Joomiraado on.

²⁵ Tawi no woodunoo Yerusalaam gorko wi'eteedo Sim'uunu. On ko feewudo e kadi ko rewoowo Joomiraado on. Himo tijjaninoo *Isra'iila'en on Dandoowo, tawi kadi *Ruuhu Seniido on no e hoore makko. ²⁶ Ruuhu Seniido on fejnинано mo wonde o maayataa ado o yi'ude Almasiihu Joomiraado on. ²⁷ Ruuhu Seniido on ardii mo haa ka *juulirde mawnde. Fewndo ko mawbe paykun kun addata kun, d'un ko Iisaa, fii laatinangol kun aadaaji mabbe tippude e Sariya Muusaa on, ²⁸ kanko Sim'uunu o tambii paykun kun ka juude makko, o jarni Alla, o wi'i:

²⁹ «Jooni non, yaa an Joomiraadso,
a accay jiyaadso maa on maaya e nder buttu
wano daalirannodaa mo non,

³⁰ sabu mi yi'irii gite an d'en kisiyee iwrudo e
maa on,

³¹ mo moyyindaa yeeso jamaaji din fow,

³² d'un-le ko ndaygu hentinanayngu leyvi aduna
on fow

e darja wonanaydo jamaa maa *Isra'iila on.»

³³ Ben makko e yumma makko ɳald'i fii ko wowlanoo fii makko kon. ³⁴ Sim'uunu du'anii be, wi'i Mariyama neene paykun kun: «Awa kun paykun wonoyay fii libugol wobbe, banta beya e nder leydi Isra'iila ndin e fii wonugol maande

b ^{2:23} 2.23 Maa:«*Kala boobo gorko afo on ka neene mun noddrioyte laabudo Joomiraado on.*» Egg. 13.2, 13.12 e Lew. 12.6

nde yimbe ben yeddata, ³⁵ e fii no mijooji berde buy feepira. An kadi a hebay nguli bernde wa tufiraande kaafa.»

³⁶ Tawi no woodunoo d'fon kadi debbo haaloowo ko Alla longini d'un wi'eteedo Hannatu, on ko gedal Fanu'iila, jeyaado e bolondaa Asiira, duubindo fota. On ko yeru duubi jeedidi wondunoo e moodi mun gila curbayaagal makko. ³⁷ Ontuma o heynii haa o hebi duubi cappande jeetati e nay. E nder d'un kadi, o iwataano ka juulirde mawnde, himo duuminoo ton e rewugol Alla, hooma, toroo jemma e nalorma. ³⁸ On debbo hewti e on saa'i tigi, himo jarna Alla, himo wowlana kala tijjinoodo hisineede ndee saare Yerusalem fii kun paykun.

³⁹ Bay Yuusufu e Mariyama wadii ko Sariya Joomiraado on yamiri kon fow, be yiltitii ka saare mabbe Naasirata, d'un ko e nder Jaliilu. ⁴⁰ Tawi paykun kun no njandude tun tiifa e nder ko kun heewata faamu kon. Awa kadi sulfu Alla on no e hoore makkun.

Fii Iisaa Paykun ka Juulirde Mawnde

⁴¹ Tawi mawbe Iisaa ben yahayno hitaande kala Yerusalem fii *Juldeere Yawtaneede nden^c.

⁴² Bay kun hebbi duubi sappoo e d'idi, be yaadi e makkun e nden juldeere wano woowiri non.

⁴³ Bay juldeere nden feyyii, mawbe paykun kun hooti, kono kapun paykun kun, d'un ko Iisaa, luttiti Yerusalem, tawi mawbe makkun ben andaali. ⁴⁴ Bay hibe sikka paykun kun no wondi e be be arduunoo ben, be yahi yeru nallal.

^c **2:41** 2.41 Egg. 12

Onsay be woni e dabbitugol kun e hakkunde sibbe mabbe ben e andindiraabe mabbe ben.
45 Bay be yiitaali kun, be yiltiti Yerusalaam fii dabbityogol kun. **46** Baldé tati baawo d'un, be tawoyi kun ka juulirde mawnde, hikun joodii hakkunde karamokoobe ben, heditii be, e kadi hikun landotonoo be lande. **47** Nanunoobe hikun yewta ben fow ɣaldfi sabu hakkille makkun d'en e ko kun jaabotonoo kon.

48 Bay mawbe makkun ben yi'ii kun, be ɣaldfi, neene makkun wi'i kun: «Boobo an, ko hondun wadandsaa men d'un? E hino d'un fow min e ben maa meden dabbitude ma e nder sokola!»

49 Kun wi'i be: «Ko fii hondun dabbitirton mi? Hari on andaa mido haani wonude ka suudu Ben an?» **50** Kono kambe be faamaali ngol kongol ngol kun haalani be.

51 Ontuma kun yiltodi e mabbe Naasirata, kun yankinanii be. Neene makkun mari dfin piiji fow ka bernde mun maanditii. **52** Tawi kun paykun, d'un ko Iisaa, no mawnude tun, faamu makko on kadi ko yeeso tun woni yaarude, himo beydoo tun welude Allaahu on e yimbe ben.

3

Fii Waaju Yaayaa ngun

(Mat. 3.1-12; Mrk. 1.1-8; Yhn. 1.19-28)

1 Ka laamu Tibariiyu hebi duubi sappoo e jowi don, d'un ko lando mawdo Roomu on, fewndo onsay hari ko Pilaatu Pontii woni lando diiwal Yahuuda ngal, tawi ko *Heroodu laamii diiwal Jaliilu ngal, tawi ko Filiipu mijjiraawo makko on kadi laamii dee leyde doo, d'un ko Ituuriyya e Taraahuuniti, tawi ko Lisaaniyyu laamii diiwal

Abiliiya ngal, ² fewndo Hannaana e Qayaafa wonnoo *yottinoobe mawbe sadaka, Allaahu on daalanno Yaayaa mo Zakariyaa'u ka wulaa. ³ Onsay Yaayaa yahi daande Yurdayniwol fow himo waajoo yimbe ben yo be aru be *lootee maande tuubuubuyee fii yo junuubaaji mabbe din yaafe ⁴ wano windori non ka deftere fii dii kongudi annabi *Isaaya:

«Kaa hawa ko hawa ewnotoodo ka wulaa, wi'a:

Moyyinee laawol Joomiraado on,
fewnon juri makko din.

⁵ Ayde oen fow uddete,
pelle njane e tosooke oen fow joltinee.

Date boyliide oen fewnee,
laawi kaanudi din newdinee.

⁶ Kala nedfanke yi'ay kisiyee iwrudo ka Alla
on.»^d

⁷ O wi'ayno din jamaaji araydi e makko fii *lootegol maande tuubuubuyee: «Ko onon yo iwdi kuura! Ko hombo tindini on dogugol tikkere aroyaynde nden? ⁸ Awa yo kuude mon den hollu wonde on tuubii. Hara on hooloraali wi'ugol wonde ko Ibraahiima woni maama mon, ko fii mi andinii on, Alla no waawi wattude cfee kaaye doo bibbe Ibraahiima. ⁹ Toode teenirde nden no waalii ka binde ledde. Kala leggal ngal rimataa bibbe moyyube, ngal soppete, ngal bugee ka yiite!»

¹⁰ Onsay yimbe ben landii mo: «Ko hondun men wadata jooni?»

^d **3:6** 3.6 Isa. 40.3-5

¹¹ O jaabii be: «Kala mardo dolokkaaji didi yo sendodu di e mo maraa. Kala jogiido kadi jaametee yo o warru wano non.»

¹² Yantoobe* sagalle ben ari e makko fii lootegol maande tuububuyee, be wi'i mo: «Karamoko, ko hondun men haani wadude?»

¹³ O wi'i be: «Wota on yantu toonin ko yamiradon kon.»

¹⁴ Suufaabbe goo kadi landii mo: «Menen-le, ko hondun men haani wadude?»

O jaabii be: «Wota on jattu hay gooto kaalisi, wota on ittin hay gooto e hoore toojne, yo njoddi mon ndin yonu on.»

¹⁵ Tawi mo bee e maăbe no miijotonoo ka bernde mun si tawii wonaa Yaayaa woni *Almasiihu on, ko fii hari jamaa on no sabbinoon. ¹⁶ Kanko Yaayaa o jaabii be, o wi'i: «Min, ko ndiyani mi woni on lootirde, kono burdo lan doole on, mo mi hewtaa hay firtugol boggi padé mun, no arude. On non ko *Ruuuhu Seniido on e yiite o lootirta on. ¹⁷ Himo jogii feeteewo makko ngon ka jungo, ko o hentinira beted^d makko on, o mooba jaametee on ka beembal makko, o sunnira foron on yiite nge dsaanotaako.»

¹⁸ Tawi Yaayaa no fejninanaynoo jamaa on Kibaaru Mooyo wondude e waajuuji heewudi.

¹⁹ Kono bay Yaayaa felii *Heroodu lando diiwal ngal, sabu ko on resi sonnaajo yumma-gooto mun on kon, fun ko debbo wi'eteedo Heroodiiya, wondude e kala bonnereeji di o wadaynoo, ²⁰ onsay Heroodu beyditiri fun hendagol Yaayaa, soka mo.

^d **3:17** 3.17 Maa: «gete».

Fii no Iisaa Lootiraa
(Mat. 3.13-17; Mrk. 1.9-11)

²¹ Fewndo ko jamaa on fow ari fii loote-gol maande tuubuubuyee, Iisaa kadi lootoraa. Fewndo ko o du'otoo, kammu ngun udditii,
²² Ruuhu Seniido on yetti mbaadi gabooru tippii e makko. Onsay hawa nanii ka kammu, no wi'a: «Ko an woni Biddo an yidaado on, mido weltormaa.»

Fii Iwdi Iisaa ndin
(Mat. 1.1-17)

²³ Ko Iisaa fudfii waajaade, ko wa mo duubi cappande tati. Ko o tuumanoodo wonugol gedal Yuusufu, on biddo Helii, ²⁴ mo Matsaata, mo Lewi, mo Malkii, mo Yannaa, mo Yuusufu, ²⁵ mo Mataasiyaa, mo Amuusa, mo Naahuuma, mo Haslii, mo Najji, ²⁶ mo Maasa, mo Mataasiyaa, mo Sim'i, mo Yuusuka, mo Yahuza, ²⁷ mo Yuuhanna, mo Reesa, mo Zarubaabila, mo Sa'alti'iila, mo Neerii, ²⁸ mo Malkii, mo Addii, mo Qusaama, mo Almudaama, mo Iiri,

²⁹ mo Yuusii, mo Aliyaasaru, mo Yuriima, mo Matsaata, mo Lewi, ³⁰ mo Sim'uunu, mo Yahuuda, mo Yuusufa, mo Yuunaana, mo Alyaqiima, ³¹ mo Malayaa, mo Maynaana, mo Mataasa, mo Naasaana, mo Daawuuda, ³² mo Yassaa'u, mo Obiida, mo Bo'aaza, mo Salmaana, mo Nahasuna, ³³ mo Ammiina-Daaba, mo Adumiina, mo Arnii, mo Hasruunu, mo Faarisa, mo Yahuuda,

³⁴ mo Yaaquuba, mo Issaaqa, mo Ibraahiima, mo Taaraha, mo Naahuura, ³⁵ mo Seruuja, mo Ra'uwa, mo Faalaja, mo Aabira, mo Saalahaa,

³⁶ mo Kiinaana, mo Arfaksaada, mo Saama, mo Nuuhu, mo Laamaka, ³⁷ mo Matuusaalaha, mo Hanuuka, mo Yaarada, mo Mahalaliila, mo Kiinaana, ³⁸ mo Anuusa, mo Siita, mo *Aadama, mo Allaahu on.

4

*Fii no Ibuliisa Ndarndori Iisaa
(Mat. 4:1-11; Mrk. 1:12-13)*

¹ Iisaa iwi Yurdayniwol no heewi *Ruuhu Seniido on. Ruuhu on nawri mo ka wulaa. ² Ko ton Ibuliisa ndarndii mo fodde baldse cappande nay. O jaamaali hay fus e nder den balde d'on fow. Bawto d'un o weelaa.

³ Onsay Ibuliisa wi'i mo: «Si tawii ko a *Bidsdo Alla, yamir ndee hayre yo nde wontu jaametee.»

⁴ Iisaa jaabii mo, wi'i: «No windii wondema: <Neddo hinaa jaametee tun wuuripta.»^e

⁵ Onsay Ibuliisa nabi mo ka buri toowude, o holli mo laamateeriji aduna on fow yeru hinyaango yiitere. ⁶ O wi'i mo: «Mi jonneta laamu e hoore majji di fow wondude e darja majji on, bay mi jonnanooma di, awa-le mi okkay di mo mi faalanaa woo. ⁷ Si tawii a sujianii lan, dii fow wontante.»

⁸ Iisaa jaabii mo, wi'i: «No windii wondema: <Ko Alla Joomiraado maa on sujjantaa, rewaa mo kanko tun.»^f

⁹ Ibuliisa nawri mo kadi Yerusalaam, joddinoyi mo ka hoore warjakere *juulirde mawnde, o wi'i mo: «Si tawii ko a Bidsdo Alla, hocco d'on, cikkodaa ka leydi, ¹⁰ ko fii no windii wondema:

e **4:4** 4.4 Yaj. 8.3

f **4:8** 4.8 Yaj. 6.13

«O yamiray malaa'ikaabe makko ben fii maa, yo be reene, ¹¹ awa kadi be tamborte juudfe mabbe den fii wota koyngal maa ngal feggo e hayre.» ^g

¹² Iisaa jaabii mo, wi'i: «No windii wondema: «Wota a ndarndo Joomiraado on, on Alla maa.» ^h

¹³ Bay Ibuliisa lannii mo ndarndaade e dii doo fow, o pottitii mo haa o ebba feere goo.

*Fii Golle Iisaa den Jaliilu
(Mat. 4:12-17; Mrk. 1:14-15)*

¹⁴ Iisaa yiltodi e bawgal Ruuhu Allaahu on ka diwal Jaliilu. Fii makko andii e nokkeeli heedudi don din fow. ¹⁵ O jannayno ka juulirde mabbe. Yimbe ben fow mantii mo.

¹⁶ O yahi Naasirata ka o ne'aa dion. E *jalaande fowteteende nden, d'un ko asewe, o naati ka juulirde wano o woowiri non. O immii fii jangugol. ¹⁷ O jonnaa deftere annabi Isaaya nden, o udditi nde, o hawrondiri e cortewol ka cfundoo windii:

¹⁸ «Ruuhu Joomiraado on no e hoore an,
sabu ko min woni Subaado on
fii fejjinangol miskinbe ben Kibaaru
Moyyo on.

O nelii lan

fii hollitugol nangaabe ben hettugol hoore mun,
hollita bumbe ben hettugol giide mun d'en,
hollita njaggaabe ben kadi hettugol hoore mun,

g 4:11 4.11 Zab. 91.11-12

h 4:12 4.12 Yaj. 6.16

¹⁹ e fii humpitugol on ndee hitaande nde Joomiraado on wadi moyyere mun nden e mun.»ⁱ

²⁰ Ontuma o nobbi deftere nden, o jonni nde wallitotoodo on, o jottii. Tawi yimbe ben fow ka nder juulirde no punnii mo. ²¹ Onsay o wi'i be: «Oo daaluyee mo nanirdon noppo mon din laatike hande.» ²² Fow seeditanii mo, ɻaldidi e din kongudi makko moyyi di o yewtaynoo, hibe wi'a: «Wonaa biddo Yuusufu on nii?»

²³ Iisaa wi'i be: «Mido andi on wowlanay lan ngol tindol doo: Nawndoowo, jawndu hoore maa tigi. Kala ko men nani wadii Kafernahuum, wadu d'un kadi ka leydi maa doo.» ²⁴ O wi'i be kadi: «Mi wowlanay on haqiiqa, annabaajo hay e gooto teddinaaka ka leydi mun. ²⁵ E hino goonga ko mi woni on wowlande: E fewndo jamaanu Iiliya, hari keynguube buy no woodi e nder leydi Isra'iila. Ko fewndo onsay wonnoo duubi tati e lebbi jeegoo kammu ngun no uddii ndiyan dan tobbaali, heege tiidunge wadi e leydi ndin fow, ²⁶ kono hari Iiliya nulaaka e hay gooto e ben keynguube, si hinaa e debbo keynguugo mo Sarfati, d'un ko e nder leydi Siduuna. ²⁷ Tawi kadi e fewndo jamaanu annabi Iliyaasa, be d'amajan buy no leydi Isra'iila, kono hari hay gooto e mabbe sellinaaka, si hinaa oo Siriyankeeo wi'eteedo Na'amaana.»

²⁸ Bay be nanii dii kongudi makko, wonnoobe ka nder juulirde ben fow tikki. ²⁹ Be immii, be duniri mo ka baawo saare, be nabi mo haa ka fello ngon yellitii don fii bugagol mo ley. Tawi

ⁱ **4:19** 4.19 Isa. 61.1-2

nden saare ko e falo ngon fello darnaa. ³⁰ Kono o ukkitii hakkunde mabbe, o feyyi, o yahi.

*Fii no Iisaa Radori Jinna, Nawndiri Nabbeeli
Buy*

(*Mrk. 1.21-28*)

³¹ Iisaa yahi Kafernahuum, nden saare ko jeyaande e diiwal Jaliilu, himo janna e nalaande fowteteende nden, d'un ko aseweere nden. ³² Ko o jannaynood kon ḥaldini jamaa on, sabu himo wowliraynood bawgal.

³³ Tawi no ka nder juulirde ton neddo mo jinnawii bonngii nangi, on sonki, wi'i: ³⁴ «Hey, ko hondsun faalanadaa men, an Iisaa oo jeyaado Naasirata? Hara ko mulugol men arandaa? Min mido andi ko hombo wonu-maa, ko a *Seniido mo Alla!»

³⁵ Onsay Iisaa yamiri ngii, wi'i: «Fanku, yaltaa e oo neddo!» Jinnawii ngin libi mo hakkunde mabbe, ngii yalti e makko, ngii barminaali mo.

³⁶ Fow ḥaldi, no wi'indira: «E ko hondsun woni ngol kongol? Oo no yamira jinnaaji bondi din e hoore doole e bawgal, di yalta!» ³⁷ Kibaaru fii makko lolli e nokkeeli heedudi don din fow.

³⁸ Bay o iwii ka juulirde, o yahi ka galle Sim'uunu. Tawi esiraawo Sim'uunu suddiido on no nawni nawnaare nguli-bandu tiifuki. Be torii mo kanko Iisaa ballal. ³⁹ O ugginii e hoore makko, o yamiri nawnaare nden, nde yalti e makko. Don kisan on immii, o woni e kurkanagol be.

⁴⁰ Bay naange ngen mutii, kala marnooibe jawdo noone jaw fow, be addi be e makko. O *fawi juude makko den e hoore mo kala e

mabbe, o sellini ße. ⁴¹ Tawi kadi jinnaaji no yaltude e buy e mabbe, hara hidi sonka, wi'a: «Ko an woni Biddo Alla on!» Kono o tonjani di, o salii di wowla, bay hari hidi andi ko kanko woni *Almasiihu on.

⁴² No weetirnoo bimbi, Iisaa yalti yaari e nokkuure wuldfinnde. Jamaaji din woni e cfabitugol mo, ße ari haa e makko. Be faalaa mo tongue ßon, hara o accaali ße ßon. ⁴³ Kono o wi'i ße: «Bee mi fejjinana deya ca'e kadi Kibaaru Mooyo on, dñun ko kibaaru fii *laamu Alla ngun, sabu ko fii dñun mi neliraa.» ⁴⁴ Onsay o woni e waajagol ka juulirde diiwal Yahuuda.

5

*Fii Taalibaabe ße Iisaa Adii Noddude ben
(Mat. 4:18-22; Mrk. 1:16-20)*

¹ Nande goo, tawi Iisaa no e daande nduu *Weendu Jaani-Saarata. Tawi jamaa no dunindira e fee makko fii hedagol daaluyee Allaahu on. ² O haynii laakoy dñidoy ka sera weendu, tawi yungoobe ben no jippii fii lootugol *jalaaji mabbe din. ³ O yawi e gokkun e koy laakoy, dñun hawrondiri e kun Sim'uunu kun, o yamiri ondon woddfintingol ße pencen on seeda. Ontuma o joodii e nder makkun, o woni e jannugol jamaa on.

⁴ Bay o gaynii jannude, o wi'i Sim'uunu: «Nawru laakun kun ka luggi ßon, bugodon jalaaji mon din, nangon liyyi.»

⁵ Sim'uunu jaabii mo: «Jom amen, oo jemma feyyudo doo fow meden yungude, men hebaali

hay fus. Kono sabu ko maakudon kon, mi bugoto jalaaji din.»

⁶ Bay be wadii d'un, be nangi liyyi duududi, benii jalaaji mabbe din fuddii tayude. ⁷ Onsay be baayi beya wondibbe mabbe wonbe e kuma laakun fii ko ara wallitoo be. Ben ari be hebbini laakoy koy difoy non, haa koy faalaa mutude.

⁸ Bay Sim'uunu Petruusu yi'ii d'un, o yani e ley koyde Iisaa, o wi'i: «Koohoojo an, wodditee lan, sabu min ko mi junuubankeejo!» ⁹ Nalaw hebi mo, hebidi mo e be o wondunoo ben fow, sabu ngol nangugol din liyyi. ¹⁰ Ko wano non kadi Yaaquuba e Yuuhanna bee bibbe Zabadii wondibbe Sim'uunu ηaldfirnoo.

Onsay Iisaa wi'i Sim'uunu: «Wota a hulu, gila jooni a wonay yungoowo yimbe.» ¹¹ Onsay be artiri laakoy koy ka pencyen, be acci fow d'on, be jokki mo.

Fii no Iisaa Nawndiri mo Damajan

(Mat. 8.1-4; Mrk. 1.40-45)

¹² Tawi Iisaa no e saare goo. Onsay mo damajan heewi e bandu mun yi'i mo, ari yani yeeso makko. O jeeji mo, o wi'i: «Koohoojo, si hidon faalaa, hidon waawi lan sellinde, mi laaba!»

¹³ Iisaa fonti jungo mun ngon, meemi mo, wi'i: «Mido faalaa, laato selludo laabaa.» Don kisan damajan dan yalti e makko.

¹⁴ Onsay o wi'i mo: «Wota a wowlan d'un hay gooto. Kono non a yahay hollitoyodaa *yotti-noowo sadaka on, ittaa sadaka fii ko labbinadaa kon wano Muusaa yamiri non fii yo d'un wonan be seedee.»

¹⁵ Kono tawi innde makko nden no burtude lollude, jamaaji buy moobii fii jentagol mo e fii pawndegol nabbeeli mabbe, ¹⁶ kono tawi Iisaa no woowunoo pottitaade ka weddii, toroo Alla.

Fii no Iisaa Imminiri Maaya-Banduujo

(Mat. 9:1-8; Mrk. 2:1-12)

¹⁷ Nande goo tawi Iisaa no jannude. Hari *Fariisiyaabe e jannoobe fii Sariya on no joodii don, hibe iwri e kodooli diiwal Jaliilu ngal fow e diiwal Yahuuda ngal e ka saare Yerusalaam. Tawi bawgal Joomiraado on no wondi e makko no o pawndira. ¹⁸ Tawi kadi wobbe arii no rondii jukkudo e boggi-dimbordi. Hibe dabba fii no be naadira mo ka nder suudu, be wallina mo yeeso Iisaa. ¹⁹ Bay be hebaali ka be naadira mo sabu d'uuufugol jamaa on, be yawdi e makko ka hoore suudu, be tufi ton yolnde, be tippindini mo e boggi-dimbordi din e hakkunde jamaa on yeeso Iisaa.

²⁰ Bay Iisaa yi'ii gomfinal mabbe ngal, o wi'i: «Musiddo, junuubaaji maa din yaafaama.»

²¹ Onsay Fariisiyaabe ñen e jannoobe fii Sariya on woni e wi'indirgol: «Ko hombo woni oo hoynoowo? Ko hombo waawi yaafaade junuubu ko wonaa Alla?»

²² Iisaa andi din muijooji mabbe, o wi'i: «Ko hondun mijantodon dun ka berde mon?

²³ Enee, hakkunde wi'ugol ‹junuubaaji maa din yaafaama› e ‹immo yahaa›, ko hondun e dii doo buri weebude?» ²⁴ O wi'i kadi: «Fii no andiron wonde *Bii-Aaden on no mari bawgal ka aduna doo fii yaafagol junuubaaji», o wi'i jukkufo on: «Immo yettaa boggi-dimbordi maa din, hootaa

ka maa.» ²⁵ On immii dōn kisan e tawnde mabbe, o yetti boggi-dimbordi makko din, o hooti ka makko, himo manta Alla. ²⁶ Kaawee hebi be fow, be manti Alla, be huli fota, hibe wi'a: «Hande men yi'ii huunde hawniinde!»

Fii no Matta Jokkiri Iisaa
(Mat. 9.9-13; Mrk. 2.13-17)

²⁷ Bawto dun, Iisaa yalti. Ko o yahata, o yi'i yantoowo sagalle wi'eteedo Lewi no joodii ka yantirde sagalle. O wi'i: «Aru jokcaa mi!» ²⁸ Lewi acci dōn ko o joginoo kon fow, o immii, o jokki mo.

²⁹ Lewi wadani mo caatal mawngal ka mun, yimbe buy yantoobe sagalle wondude e yimbe goo joododi e mabbe. ³⁰ Fariisiyaabe ben e jan-noobe fii Sariya on jeyaabe e fedde mabbe nden yuni taalibaabe Iisaa ben, be wi'i be: «E ko fii hondun jaamidanton, yaridon e junuubankeebe ben e yantoobe sagalle ben?»

³¹ Iisaa jaabii be, wi'i: «Hinaa sellube ben hatonjini e pawndoowo, kono ko pawbe ben. ³² Min, wonaa noddugol feewube ben mi arani, kono ko junuubankeebe ben fii yo be tuubu.»

Landal fii Hoorugol
(Mat. 9.14-17; Mrk. 2.18-22)

³³ Onsay wobbe wi'i mo kanko Iisaa: «Taalibaabe Yaayaa ben e taalibaabe Fariisiyaabe ben kapun hooray, juula soono woo. An-le, be maa ben no jaamude, yara!»

³⁴ Iisaa jaabii be wi'i: «Taw si on waaway hoorinde njaatigiibe jom jomba jande peera on, hara himo wondi e mabbe? ³⁵ Aray e saa'i nde

jom jomba pottinaa e hakkunde mabbe, onsay e
den balde d' on be hooray.»

³⁶ O haalani be ngal misal doo, o wi'i: «Hay
gooto yettataa ceelol bagi keso, walkira dolokke
kidso. Si hinaa d'un, haray ontigi bonnii kesun
d'un, walkere nden kadi yaadataaa e kid'd'un d'un.

³⁷ Hay gooto loowataa njaram *wiijnu kesan e
nder bootooji guri kid'di. Si hinaa d'un, d'an
njaram kesan wonay sabu ko feeri din guri,
njaram d'an hibba, bootooji guri din kadi bona.

³⁸ Kono njaram kesan ko e nder bootooji guri
kesi loowetee. ³⁹ Kala yarudo njaram kid'd'an
faaletaake njaram kesan, ko fii o wi'ay: «Ko
kid'd'an d'an buri welude.» »

6

Landal fii Nalaande Fowteteende nden
(Mat. 12.1-8; Mrk. 2.23-28)

¹ E aseweere goo, d'un ko *nalaande fowte-
teende nden, hari Iisaa no rewude e gese ngawri,
taalibaabe makko ben no woocora cawti den
gese, worsa di, naama. ² Fariisiyaabe* goo
wi'i: «Ko hondun wadanton koo ko dagaaki e
nalaande fowteteende nden?»

³ Kono Iisaa jaabii be, wi'i: «Hara on jangaali
ko Daawuuda wadunoo kon fewndo o weelaa,
kanko e yimbe wondunoobe e makko ben? ⁴ O
naati ka nder suudu Alla, o yetti bireedijje
weebitaade fii sadaka den, o naami ko dagani-
noo *yottinoobe sadaka ben tun kon, o okkor
kadi wondube e makko ben.» ⁵ Onsay o wi'i: «Ko
*Bii-Aaden on woni jom nalaande fowteteende
nden.»

*Fii no Iisaa Selliniri Maaya-Jungoojo
(Mat. 12.9-14; Mrk. 3.1-6)*

⁶ E aseweere goo, Iisaa naati ka juulirde, o woni e jannugol. Tawi goddo no nder ton mo jungo mun jaamo maayi. ⁷ Nde tawnoo jannoobe fii Sariya on ben e Fariisiyaabe ben no faalaa hebude ko be lamitora, be toona Iisaa, tawi hibe ndaara si o jawnday e asewe, dun ko jalaande fowteteende nden. ⁸ Kono tawi Iisaa no andunoo din mijooji mabbé. Onsay o wi'i maaya-jungoojo on: «Immo darodaa ka hakkunde doo.» On immii, darii.

⁹ Onsay Iisaa wi'i be: «Mi landike on, hara no dagii ka goddo wada ko moyyi maa ko boni, danda wonkii maa wona sabu makki e aseweere?» ¹⁰ Onsay o ndaari be fow, o wi'i on neddo: «Fontu jungo maa ngon.» On fonti ngo, jungo makko ngon selli. ¹¹ Dun tikkini Fariisiyaabe ben e jannoobe fii Sariya on ben fota, be woni e yeddondirgol ko hondun be wadata Iisaa.

*Fii no Iisaa Subori Sahaabaabe mun ben
(Mat. 10.1-4; Mrk. 3.13-19)*

¹² E nder den balde don, Iisaa yaari ka fello fii toragol Alla, o waali toraade. ¹³ Bay weetii, o noddi taalibaabe makko ben, o subii sappoo e dido e mabbé, o toddii be *sahaabaabe: ¹⁴ dun ko Sim'uunu, on mo o jammi Petruusu, e Andaraawu neene-gooto Sim'uunu on, e Yaaquuba e Yuuhanna e Filiipu e Bartolomaawu ¹⁵ e Matta e Tooma e Yaaquuba mo Alfaa e Sim'uunu tawdaado e fedde *Zelotiibe ben, ¹⁶ e Yahuuda

mo Yaaquuba e Yudaasi Iskariiyu, janfoytoodo mo on.

*Fii Waaju ngun ka hoore Fello
(Mat. 4.23-25; Mrk. 3.7-11)*

¹⁷ Iisaa jippodi e ßen taalibaabe ße o subii, o darii e nokkuure ndeylere ka falo. Tawi taalibaabe makko dhuufube no e nden nokkuure, wondude e jamaa moolanaado iwrudo e cende ßeen fow e diiwal Yahuuda ngal e saare Yerusalaam nden e dñi bañjeeji Tiiri e Siduuna ka daande baharu. ¹⁸ Ben ko arnoobe hedagol mo e fii pawndegol nabbeeli mun. Be jinna tampinnoo ßen sellinaa. ¹⁹ Awa kadi mo kala e mabbe no faalanoo mo meemude, bay himo wondunoo e bawgal pawndaynoongal be fow.

²⁰ O banti gite makko ßen, o ndaari taalibaabe ßen, o wi'i:

«On malii yo onon miskinbe,
bay *laamu Alla ngun ko onon wonani.

²¹ On malii yo onon weelaabe fewndo doo,
bay on harnoyte.

On malii yo onon wulloobe fewndo doo,
bay on weltoyto.

²² On wonay malaabe nde yimbe ßen aji on
e nde be radii on, be yenni on,
be piddini inde mon ßen sabu Bii-Aaden on.

²³ Nden jande, weltee, jijon welo-welo,
bay hidon maranaa njoddi mawndi ka
kammu,
ko fii ko nii kadi mawbe mabbe ßen war-
raynoo annabaabe ßen.

²⁴ Kono bone wonanii on onon aldube ßen,
bay on hendike neweende ko mon kon!

25 Bone wonanii on onon bee haarube jooni,
bay on weeloyte.

Bone wonanii on onon bee jalooße hande,
bay on yoomoyay wullon.

26 Bone wonanii on nde yimbe ben fow wowli on
ko moyyi,
bay ko non mawbe mabbe ben wowliraynoo
fii bee waditiibe annabaabe.»

Fii Yidugol Aybe mun

27 «Kono min mi wi'ay on yo onon bee hedsiibe lan: Yidee aybe mon ben, moyyodon e anube on ben, **28** du'anodfon hudoobe on ben, toranodfon tampinoobe on ben. **29** Mo bantike ma e waabbugo, tudan mo ngoya kadi. Mo jattii ma waramba, wota a hadu mo yettude fokiya on kadi. **30** Okkor kala toriido ma, hara kadi a yantaali ko maa kon e juude jattube ma ben. **31** Wadanee yimbe ben wano faaliradon yo be wadan on non.

32 «Si on yidii yidube on ben, haray ko moyyere honde heboyton? Ko fii hay junuubankeeben no yidi yidube be ben. **33** Si on moyyike e moyyiibe e mo'on ben, haray ko moyyere honde heboyton? Hay junuubanke'en ko non warrata. **34** Si on pawlii be tanyinidfon yobitay on ben, haray ko moyyere honde heboyton? Hay junuubanke'en pawlindiray fii yo be yobitindir. **35** Kono yidee aybe mon ben, wadanon be ko moyyi, nawlon be hara on habbaaki yobiteede. Dun on heboyay njoddi mawndi, wonoyon kadi bibbe Jom Bural on, sabu himo moyyani dullube ben e bonbe ben.

36 Wonee yurmeteebe wano Baaba mon Jom Bural on woniri Yurmeteedo non.»

Fii Naawitagol
(Mat. 7.1-5)

37 «Wota on jaawu, d'un on jaawetaake. Wota on felu, d'un on feletaake. Yaafee, d'un on yaafoyte. **38** Okkee, d'un on okkorte. On etirante sariyaare yed'sunde, timmunde, yeyaande haa juuri, wadanedon ka jiifaaji mon. Ko fii ko sariyaare nde etirdon nden etirantedon.»

39 O wowlani be ngal misal d'oo, o wi'i: «Hara bundo no waawi dowude bundo? Hara be d'idoon non be yanidaali e nder ngayka? **40** Taalibaajo buraa karamoko mun. Kono kala taalibaajo eltiido wa'ay wa karamoko mun.

41 «Ko honno yiirataa lojol wongol ka yiitere musid'fo maa on, hara a yi'aali falimawal wongal ka yiitere maa ngal? **42** Ko honno wawrataa wi'ude musid'fo maa: «Musid'fo, accu mi ittane lojol ngol ka yiitere maa», hara an, a wattanaali yiila e falimawal wongal ka yiitere maa ngal? Ko an yo faasiqijo, ittu taho falimawal wongal ka yiitere maa ngal, onsay non a yi'ay no ittiranaa musid'fo maa on lojol wongol ka yiitere makko ngol.»

Misal Yettaangal e Leggal e Bibbe Mun
(Mat. 7.16-20, 12.33-35)

43 «Leggal moyyal rimataa bibbe bonbe, wano non kadi leggal bongal rimataa bibbe moyyube.

44 Leggal kala no anditiree bibbe mun: ko fii on ittataa yibbe e bulle-kojon, wano non kadi on

ittataa sungalaj e bulle-bete. ⁴⁵ Neddo moyyo on yaltinay moyyere ka moyyuki bernde mun, neddo bondo on kadi yaltina bonki ka bonki mun, ko fii ko ko heewi e bernde woo hunduko wowlata.»

*Fii Ninnugol Waajuuji d'in
(Mat. 7.24-27)*

⁴⁶ «Ko fii hondun noddanton mi ‹Koohoojo, Koohoojo›, hara on wadataa ko mi wi'i on kon?

⁴⁷ Kala neddo ardo e an, nani waajuuji an d'in huutori di, mi hollay on no on wa'i. ⁴⁸ On no wa'i wa darnudo suudu. Hara o jasu gaawol luggungol haa e fetere, o fudfii d'on mahude. Nde waamere nden wadi, ndiyan dan ari e suudu ndun, d'an waawataa ndu dillinde, ko fii daroodi mayru on no tiidi. ⁴⁹ Kono kala nanudo kongudi an d'in, huutoraali di, on no wa'i wa darnudo suudu ndu jasanaaka gaawol. Ilol ndiyan d'an hawri e mayru tun, ndu yani kisan, fii mayru on mula few.»

7

*Fii Kurkaadu Suufaajo on
(Mat. 8.5-13; Yhn. 4.46-54)*

¹ Bay o gaynii waajaade jamaa heditiido mo on, o naati Kafernahuum. ² Tawi hooreejo suufaabe teemedere no mari kurkaadu ndu o yidunoo, hari ndun no nawni haa moggo mayde.

³ Bay o nanii fii Iisaa, o nuli mawbe *Yahuudiyankeebe goo e makko fii toragol mo arugol pawndana mo ndun kurkaadu makko. ⁴ Bay be

j **6:44** 6.44 Maa: «sumbala».

arii be tawii Iisaa, be jeeji mo be multi, be wi'i: «Himo handi e wadaneede d'un, ⁵ ko fii himo yidi lenol men ngol, awa-le kadi ko kanko darni juulirde amen nden.» ⁶ Iisaa yaadi e maßbe.

Bay o battike suudu hooreejo suufaabē ben, on suufaajo nuli yibbe mun goo e Iisaa ko wi'a mo: «Koohoojo, wota on tampintino, sabu mi foddaa e mo'on ka suudu an. ⁷ Ko d'un wadi si min tigi mi foddaa e arugol haa ka mon. Kono maakee tun kongol gootol, kurkaadu an ndun ndikkay. ⁸ Ko fii min tigi ko mi wondo e ley kongol hooreebe goo, min kadi mido mari suufaabē wonbe e ley kongol an. Si mi wi'ii goddo e ben «yahu», o yahay. Si mi wi'ii oya on «aru», o aray. Awa kadi si mi wi'ii kurkaadu an ndun «wadu d'un», ndu waday.»

⁹ Bay Iisaa nanii din kongudi makko, o ñaldi, o fewti e jamaa jokkudo mo on, o wi'i be: «Mi andinii on, hay ka *Isra'iila'en mi yi'aali neddo gomdinirdo wa oo.» ¹⁰ Bay nulanoobe ßen yiltikie ka suudu, be tawti kurkaadu nawnunoondu ndun ndikkii.

Fii no Biddo Keynguujo on Wurnitiraa

¹¹ E nder den balde d'on, Iisaa yahi e saare wi'eteende Naa'ina, taalibaabē makko ben wonderdude e jamaa duududo yaadi e makko. ¹² Ko o hewtaynoo ka naatirgal saare, o fotti e rondiibe furee, hari on furee ko biddo bajjo ka neene mun, tawi kadi neene makko ko keynguujo. Tawi jamaa duududo e nden saare no wondi e on debbo.

¹³ Bay Koohoojo on yi'ii on keynguujo, o yurmaa mo, o wi'i mo: «Wota a wullu!» ¹⁴ O

badii furee on, o *fawi jungo makko ngon e hoore goyki kin, rontiibe furee on dartii, o wi'i: «Suka, mi yamirii ma yo a immo!» ¹⁵ Onsay maydo on immii joodii, o fuudii yewtude. Iisaa jonniti mo yumma makko.

¹⁶ Be fow be huli, be manti Alla, be wi'i: «Annabaajo kelsudo feepii e fewndo men. Allaahu on arii faabagol yimbe mun ben!» ¹⁷ Fii ngal kuugal makko lolli e diwal Yahuuda ngal haa e banjeeji heedudi don din fow.

*Fii Lande Yaayaa den
(Mat. 11.2-19)*

¹⁸ Taalibaabe Yaayaa ben humpiti mo kanko Yaayaa kon ko wadi fow. ¹⁹ Yaayaa noddi dido e taalibaabe mun ben, o immini be e Koohoojo on yo be lando mo: «Taw si ko onon woni haanudo arude on, kaa hara yo men habbo goddo goo?»

²⁰ Bay ben imminaabe hewtii, be wi'i Iisaa: «Ko Yaayaa *lootoowo maande tuubuubuyee on immini men haa e mon fii landagol on si ko onon woni haanudo arude on, kaa hara yo men habbo goddo goo?»

²¹ Ko e on saa'i mo be hewti e mun tigi, Iisaa sellini jawbe e jukkuge buy e jinnaabe, o wontini kadi bumbe buy. ²² Ontuma o jaabii ben be Yaayaa immini, o wi'i be: «Yahee fillitanodon Yaayaa ko yi'udon kon e ko nanudon kon wonde, bumbe ben yi'ii, boofoobe ben yahii, be d'amajan ben sellinaama, be laabii, pahidube ben nanii, maybe no immintineede, Kibaaru Moyyo on no

fepjinaneede miskinbe ben. ²³ Kala mo feggaaki e an ko malaado.^k

²⁴ Bay ben be Yaayaa nelunoo yiltitike, onsay Iisaa fuddii yewtude jamaa on fii Yaayaa, o landii be dundsoo, o wi'i: «Ko hondun yahunodon ndaaroygol ka wulaa? Hara ko kudsol ngol henu ndun dimbata? ²⁵ Kaa ko hondun yahunodon ndaarugol? Ko neddo borniido conci dimi? Ndaaree bee borniibe conci dimi, wuurube ngurndan moyyan no e nder galleeji laamu. ²⁶ Ko hondun non yahunodon ndaarugol? Ko annabaajo? Hiiyii, min mi wi'ay on, ko ko buri annabaajo. ²⁷ Ko oo doo woni mo fii mun windii on:

«Awa, mido imminde nulaado an on yeeso maa,
fii ko fertano-maa laawol maa ngol.»^m

²⁸ «Mi andinii on, alaa mo suddiido jibini burdo Yaayaa. Kono non burdo fandude on ka laamateeri Alla no buri mo teddude.»

²⁹ (Jamaa hedinoodo mo on e yantoobe sagalle ben jabi laawol Alla feewungol ngol e nder ko be lootanoo maande tuubuubuyee ko Yaayaa lootaynoo kon. ³⁰ Kono Fariisiyaabe ben e waawube fii Sariya ben bugitii ko Allaahu on ebbannoo be kon, be salii Yaayaa loota be maande tuubuubuyee.)

³¹ «Hara ko e hondun mi ebbindirta bee yimbe nguu jamaanu? E ko hondun be nandi? ³² Hibé nandi e faybe joodiibe e kubitirde, hara ben no noddindira, wi'a:

«Men wuttanii on ceri, on amaali,

^k **7:23** 7.23 Maa: «Kala mo ronkaali gomfinde lan ko malaado.»

^m **7:27** 7.27 Mal. 3.1

men yimanii on gimdi yurmudi, on wul-laali!»

³³ «Ko fii Yaayaa lootoowo maande tuubuubuyee on arno, o naamataano ko defaa, o yarataano ko mandilinta, wi'udfon: «On ko mo jinna!»

³⁴ Bii-Aaden* on kadi arii no naama no yara, wi'udfon: «On ko reeredudo, yaroowo, weldudo e yantoobe sagalle e junuubanke'en!» ³⁵ Kono jabube faamu Allaahu on ben hollay wonde ko ngu feewungu.»

Fii no Debbo Junuubankeejo on Yaaforaa

³⁶ Fariisiyaajo goo wi'eteedo Sim'uunu torii Iisaa hawtidugol e makko. Iisaa naati ka suudu Fariisiyaajo on, o toolii fii nafagol. ³⁷ Tawi debbo junuubankeejo no e nden saare, on humpitii Iisaa no nafaade ka suudu Fariisiyaajo on. O ardi e tindohun hayre daneere tew angiri, ³⁸ o wontiri baawo Iisaa, o ugginii ka hoore koyde makko, o wulli haa gondi makko dñin bùbbini koyde Iisaa den. Ontuma debbo on fittiri de sukundu mun ndun, o lunni de, o wuji de angiri.

³⁹ Bay Fariisiyaajo noddunoodo Iisaa on yi'ii dun, o wi'i e bernde makko: «Si tawno oo ko annabaajo, o andayno ko hombo woni oo debbo meemudo mo e ko honno on sifori, sabu oo ko junuubankeejo!»

⁴⁰ Iisaa yetti haala kan, wi'i: «Sim'uunu, no woodi ko mi haalanay-maa.»

On jaabii: «Maakee yo karamoko'en.»

⁴¹ O wi'i: «Goso no jawlunoo yimbe dido. Gooto on no joganii mo *dinaruuji teemedde jowi, oya on ko *dinaruuji cappande jowi. ⁴² Bay

ben hebaali ko yobitira mo, o yaafanii be dñidoo non ko be jawlili mo kon. Ko hombo e ñen dñido burata mo yidude?»

⁴³ Sim'uunu jaabii: «Haray ko burdo namaande tiisunde on.»

Onsay Iisaa wi'i mo: «A jaawirii no moyyiri.»

⁴⁴ O fewti e debbo on, o wi'i Sim'uunu: «A yi'ii oo debbo? An, mi naatii ka suudu maa, a okkoraali lan ndiyani ko mi sembora, kono oo dñoo bñbbinirii koyde an ñen gondñi mun dñin, o fittirii de sukundu makko ndun. ⁴⁵ A hirbanooki lan lunnisa, kono kanko gila mi naati dñoo, himo lunnaade lan koyde ñen. ⁴⁶ A wadaali nebban ka hoore an, kono kanko o wadii angiri ka koyde an. ⁴⁷ Awa mi andinii ma, junuubaaji makko e duudude yaafaama, ko dñun wadi si giggol makko ngol no tiidi. Kono mo yaafaama seeda, ko seeda yidata.»

⁴⁸ Onsay o wi'i debbo on: «Junuubaaji maa dñin yaafaama.»

⁴⁹ Onsay jaamidaynoobe e makko ñen mijiji e berde mun: «Ko hombo woni oo neddo yaafotoodo hay junuubaaji?»

⁵⁰ Ontuma o wi'i debbo on: «Gomfinal maa ngal dandii ma. Yahu e hoore buttu.»

8

Fii Dowtunoobe Iisaa ñen

¹ Bawto dñun, Iisaa yahayno gila e saare hebi e saare, gila e hodo haa e kodolun wondude e *sahaabaabe makko ñen sappoo e dñido, hara himo waajoo fejnina Kibaaru Moyyo *laamu Alla ngun. ² Himo wondunoo kadi e rewbe

goo jawndaabe jinnaaji bondi e nabbeeli, wano Mariyama oo jammaado Mariyama Magaduuna, mo jinnaaji jeedidi yaltinaa e mun, ³ e Yuuwanna on ko sonnaajo Kuusa oo mbatulaajo *Heroodu, e Suusanatu, e wobbe goo wallitoraynoobe be keyeeji mun.

*Misal Yettaangal e Remoowo
(Mat. 13.1-23; Mrk. 4.1-20)*

⁴ Jamaa njano moobii, yimbe buy iwri e ca'e heewude, ari e makko. O wadani be ngal misal doo: ⁵ «Ko remoowo yaltunoo sankugol awdi mun ndin. E nder ko o sankata kon, gabbe goo yani ka datal, feyyoobe ben yaabi, colli din kadi modi de. ⁶ Godde den yani e hoore fetere, no de fudirnoo, de yoori, bay de alaa e buubol. ⁷ Godde goo kadi yani ka sooyoore, de fudidi e mayre, sooyoore nden modi de. ⁸ Godde goo yani ka leydi moyyiri. De fudi, de rimi cawti di gabbe teemedere.» Wa fewndo ko o yewtaynoo dun, o ewnii, o wi'i: «Mo no mari noppi nanirdi yo nanu!»

⁹ Onsay taalibaabe makko ben landii mo ko ngal misal doo firi. ¹⁰ O jaabii be: «Onon on yedaama andugol gundooji laamu Alla ngun. Kono beya luttube, d'un wowlirante be mise, fii yo be ndaaru, hara be yi'ataa, yo be nanu, hara be faamataa.n

¹¹ «E hino ko ngal misal firi: Awdi ndin ko daalol Alla ngol. ¹² Nde awdi sinkaandi ndin saami ka datal, d'un no wa'i wa nde wobbe nani daalol ngol, kono Ibuliisa ara itta ngol e berde

mabbe fii wota be gomdin sakko be dandee.
¹³ Nde awdi sinkaandi ndin saami ka fetere, dun no wa'i wa nde wobbe nani daalol ngol, be jabira ngol weltaare. Kono be alaa dadfi. Be gomdinay haa e saa'i, kono si be ndarndaama, be tertoo.
¹⁴ Nde awdi sinkaandi ndin saami ka sooyoore, dun no wa'i wa nde wobbe nani daalol ngol, kono hara be modiraama anndeiji aduna e jawle aduna e faaleeji ngurndan aduna e nder yaadu mabbe ndun, be ronka rimude moyya. ¹⁵ Nde awdi sinkaandi ndin saami ka leydi moyyiri, dun no wa'i wa nde wobbe naniri daaluyee on bernde laabunde moyyunde, jogitoo mara. Ko ben woni rimoobe e nder wakkilaare.

*Misal Yettaangal e Lampu
 (Mrk. 4.21-25)*

¹⁶ «Hay gooto hubbintaa lampu buuma mo maa sorna mo e ley danki. Kono o jodfinay mo e kene fii no naatoobe ben yi'ira ndaygu ngun.
¹⁷ Ko fii alaa ko suudii ko feenataa, kala gundoo ko sakkitora ko feepoygol. ¹⁸ Awa wattanee yiila e no hedorton non, ko fii ko mardo beydantee, kono mo maraa on jabitante hay ko o sikki himo mari kon.»

*Fii Beynguure Iisaa nden
 (Mat. 12.46-50; Mrk. 3.31-35)*

¹⁹ Yumma Iisaa e yumma-gootoobe makko ben ari, kono be waawaali tumbondirde e makko hakkee yimbe. ²⁰ O humpitaa wonde: «Yumma mon e yumma-gootoobe mon ben no darii ka yaasi, hibe faalaa yiidude e mon.

²¹ Kono o jaabii be, o wi'i: «Yumma an e yumma-gootoobe an ben ko hedfotoobe daaluyee Alla on, pinna mo.»

*Fii no Iisaa Deeyiniri Waabiliire nden
(Mat. 8.23-27; Mrk. 4.35-41)*

²² Nande goo Iisaa bakii e laakun wondude e taalibaabe mun ben. O wi'i be: «Lumbiten ka gada weendu.» Be yahi. ²³ E nder ko be lumbata kon, Iisaa cfaanii. Waabiliire tiifunde wondunde e hendu tippii ka weendu, laakun kun fudsii heewude ndiyan, d'un wonani be nawaare hulbiniinde.

²⁴ Be ari, be findini mo, be wi'i: «Karamoko'en, Karamoko'en, en mulay woni!»

O immii, o tonjani hendu ndun e morloode ndiyan den, de deeyiti, onsay buttu wadi.

²⁵ Ontuma o wi'i be: «Ko honto gomfinal mon ngal woni?»

Be huli, be njaldi, hibe wi'indira: «Ko hombo woni oo neddo yamiroowo hay hendu ndun e ndiyan d'an, d'un doftoo mo?»

*Fii no Iisaa Selliniri Jinnaado
(Mat. 8.28-34; Mrk. 5.1-20)*

²⁶ Be hewtoyi e ndii leydi bee Gadariyankooбе tiindondirndi e ngal diwal Jaliilu. ²⁷ Bay Iisaa jippike ka leydi, neddo jeyaado e nden saare mo jinnaaji buy nangi, ari e makko. Tawi gila neebii o bornotaako conci, o naatataa e suudu, ko ka hakkunde genaale o hodfunoo. ²⁸ No o yiirunoo Iisaa, o sonki, o yani e ley koyde makko, o ewnii, himo wi'a: «Ko hondun faalanadaa lan an Iisaa *Biddo Alla Jom Bural on? Mi torike ma wota a

lettan!» ²⁹ Ngii jinnawii bonngii wi'i d'un sabu ko Iisaa yamiraynoo ngin yaltugol e oo neddo kon. Tawi ngin jinnawii nangayno mo soono woo, o dumbee juude e koyde fii aynugol mo, kono o bonnayno d'en jolokooje fow, onsay jinnawii ngin nawra mo ka wulaaji.

³⁰ Onsay Iisaa landii mo: «Ko honno innetedaa?»

Tawde hari jinnaaji buy no e makko, o jaabii: «Ko Konu.» ³¹ Awa kadi hid'i jeejaynoo Iisaa fii wota o yamir d'i yahugol ka *gaygii ngin alaa kattudi ngin.

³² Tawi wuro kose moolanaango no ooraynoo ka falo. Onsay jinnaaji d'in jeeji Iisaa yo o accu d'i naata e d'in koseeji. O newnani d'i d'un. ³³ Jinnaaji d'in yalti e on neddo, d'i naati e nder d'in koseeji. Onsay koseeji d'in giddi ka falo, d'i unoyii ka weendu, d'i yoolii.

³⁴ Bay ornaynoobe d'i ben yi'ii d'un, be dogi, be fillitoyii d'un ka saare e ka fulawaaji. ³⁵ Onsay yimbe ben ari yi'ugol kon ko wadi. Be ari e Iisaa, be tawi on neddo mo jinnaaji d'in yalti e mun no joodii ka ley koyde Iisaa, himo bornii, himo wondi e hakkille timmude, be huli. ³⁶ Yi'unooibe ko wadi kon fillitanii be no jinnanoodo on sellini-raa. ³⁷ Onsay jeyaabe e diiwal Gadariyankooibe ben fow torii mo yaltugol ka mabbe sabu kulol ngol be hebi d'on ngol. Ontuma Iisaa bakii ka laakun yiltitii.

³⁸ Onsay neddo mo jinnaaji d'in yaltinaa e mun on torii Iisaa wondugol e makko. Kono Iisaa yilti mo, o wi'i mo: ³⁹ «Hootu ka mon, fillitoyodaa ko

Alla wadan-maa kon.» Onsay o yahi, o ukkii ka saare, o fillitii kala ko Iisaa wadsani mo kon.

*Fii no Iisaa Wurnitiri Jiwo, O Sellini Debbo
(Mat. 9.18-26; Mrk. 5.21-43)*

⁴⁰ Bay Iisaa lumbitii, jamaa on jaßbii mo, ko fii hari fow no sabbii mo. ⁴¹ Tun oo hooreejo juulirde maßbe wi'eteedo Yaayirusu ari e makko. Onsay o yani e ley koyde Iisaa, o torii mo hewtugol ka suudu makko, ⁴² bay tawi jiwo makko bajjo mo wa duubi sappoo e didi no e daande mayde.

Wa fewndo kanko Iisaa o yahata ka oo neddo, tawi jamaa on no bittiri mo cende ñen fow. ⁴³ Tawi kadi debbo no e nden nokkuure, hebii duubi sappoo e didi, himo soncaade. Awa kadi o ittii jawle makko fow o yobii ñawndoobe ben, kono hay gooto e maßbe waawaali mo sellinde. ⁴⁴ On debbo wontiri baawo Iisaa. No o meemirnood kombol dolokke makko on, ko o soncotonoo kon tayi.

⁴⁵ Onsay Iisaa wi'i: «Ko hombo meemimmi?»

Tun mo kala wi'i wonaa kajun. Onsay Petruusu wi'i: «Karamoko'en, jamaa on no hundi on, awa kadi hibe hißbii on!»

⁴⁶ Kono Iisaa jaabii, o wi'i: «Goddo meemii lan, ko fii mi andii wonde bawgal an ngal gollii godsun.»

⁴⁷ Nde debbo on tawnoo ko o wadi kon pulfitike, o ari himo diwna, o yani e ley koyde Iisaa, o furniti yeeso jamaa on fow ko fii honduun o meemani mo e ko honno kadi o selliniraadon kisan. ⁴⁸ Onsay Iisaa wi'i mo: «Jiwo an, gomdfinal maa ngal sellinii ma. Yahu e hoore buttu.»

49 Wa fewndo ko Iisaa yewtata d'un, gorko jeyaado ka hooreejo juulirde nden ari, wi'i mo: «Jiwo maa on maayii. Hay tertidaa sonjugol oo karamokoojo.»

50 Kono bay Iisaa nanii d'un, o wi'i hooreejo juulirde nden: «Wota a hulu, gomdin tun, jiwo maa on hisay.»

51 Bay Iisaa hewtii ka hooreejo juulirde nden, o jabaano naatidude hay e gooto ka suudu si hinaa Petruusu e Yaaquauba e Yuuhanna wondude e yumma jiwo on e ben jiwo on. **52** Tawi fow no wulla fesa fii on jiwo. Onsay Iisaa wi'i: «Wota on wullu mo, ko fii o maayaali, o daani.»

53 Onsay be jali mo, ko fii hibe andi jiwo on maayii. **54** Onsay Iisaa nangi jungo jiwo on, o ewnii, o wi'i: «Jiwo, immo!» **55** Tun wonkii jiwo on arti, o immii don kisan. Onsay Iisaa yamiri be okkorgol mo naametee. **56** Kaawee hebi mawbe jiwo on. Kono o yamiri be wota be wowlan hay gooto kon ko wadi d'on.

9

Fii no Sahaabaabe ben Sappoo e Didoo Nuliraa (Mat. 10.2-20; Mrk. 6.7-13)

1 O noddi be o subunoo ben sappoo e didoo, o okki be bawgal e doole e hoore jinnaaji din fow e fii sellingol nabbeeli. **2** O immini be waajoyagol fii *laamu Alla ngun e sellingol nawbe ben. **3** O wi'i be: «Wota on yoobo hay huunde e nder yaadu mon ndun, gila e tuggordu maa bonfo maa naametee goo haa nabani e kaalisi. Awa kadi wota on yoobo dolokkaaji didi.»

⁴ O wi'i ße kadi: «Kala suudu ka naatoydon, weeree ðon haa tuma fokkitudon woo, ⁵ e kala saare nde yimbe ßen jabaali on e mun, nde hidon yalta ðon woo, honkee mbullaari teppe mon ðen fii yo ðun wonan be seedee ella maßbe on.» ⁶ Onsay ße yahi kodolun e kodolii, hibe waajoo fii Kibaaru Moyyo on e kadi hibe sellina hen fow jawbe ßen.

*Fii Nyalaw Heroodu on
(Mat. 14.1-12; Mrk. 6.14-16)*

⁷ Heroodu* lando diiwal Jaliilu ngal humpitii fii ko woni wadude kon, ðun jiibi mo bernde, sabu hari woßbe no wi'a ko Yaayaa immintinaa e hakkunde maybe ßen, ⁸ woßbe ßen no wi'a wondema ko Iiliya feejiti, woßbe goo no wi'a wondema ko goddo e annabaabe hibbe ßen immitii. ⁹ Kono Heroodu wi'i: «Mi tayiino daande Yaayaa nden, e hara ko hombo woni oo mo mi nanata fii mun nii?» Gila ðun himo etoo no o yi'ira mo.

*Fii no Iisaa Namminiri Yimbe Guluuje Njowo
(Mat. 14.13-21; Mrk. 6.30-44; Yhn. 6.1-14)*

¹⁰ Bay ben *sahaabaabe ße o imminnoo hewtii, be sifanii mo kanko Iisaa ko be wadoyi kon fow. Onsay o yaadi e maßbe haa e takko ndee saare Bayti-Sa'iida, be bakitii ðon. ¹¹ No yimbe ßen humpitornoo ðun, be jokki mo. Onsay Iisaa tolni ße, o yewti ße fii laamu Alla ngun, o ñawndi kadi ßen hatonjinbe e ñawndeede.

¹² Tawi ñallal ngal woßdike. Onsay sappoo e didooße ßen ari e makko, be wi'i mo: «Accitee non jamaa on, be yaha ka kodooli e ka fulawaaji

kawtirdi e doo, be d'ab'boya ko be jaama e ka be waaloo, ko fii ko e nokkuure wulfinnde wond'en doo.»

¹³ Onsay Iisaa wi'i be: «Onon tigi okkoree be ko be jaama.»

Kono be jaabii, be wi'i: «Ko bireedijje jowi e liyyi d'idi pet men mari d'oo, si hinaa hara menen tigi men yahay men soodoya ko oo jamaa d'oo fow jaama!» ¹⁴ Tawi worbe wonbe don ben tun ko wa be guluuje njowo.

Onsay Iisaa yamiri taalibaabe mun ben, wi'i: «Joddfiniree be mojobe mojobe, mojobere kala cappande njowo.» ¹⁵ Be joddfiniri be no o wi'iri be non. ¹⁶ Onsay Iisaa yetti bireedijje den jowi e liyyi din d'idi, o banti gite makko den, o fewti ka kammu, o du'ii. Ontuma o tayiti de, o woni e jonnugol taalibaabe makko ben fii yo ben hewtin jamaa on. ¹⁷ Fow jaami haa haari. Be moobiti debeeje sappoo e d'idi kunte ko lutti.

*Fii Qirritannde Petruusu nden
(Mat. 16.13-19; Mrk. 8.27-30)*

¹⁸ Nande goo tawi Iisaa no wondi e taalibaabe mun ben ka wirnii, himo toraade Alla. Ontuma o landii be d'undoo, o wi'i: «E wi'i jamaa on, ko hombo woni lan min?»

¹⁹ Be jaabii mo, be wi'i: «Wobbe no wi'a ko onon woni Yaayaa lootaynoodo on, wobbe kadi no wi'a ko onon woni Iiliya, wobbe goo kadi no wi'a ko on annabaajo kiddo goo immintinaa.»

²⁰ Onsay o landii be, o wi'i: «Onon non wi'udon ko hombo woni lan min?»

Petruusu jaabii mo, wi'i: «Ko onon woni *Almasiihu Alla on.»

21 Iisaa yamiri be, tentini, wota be wowlan d^un hay gooto. **22** O beyditi e d^un, o wi'i: «Maa *Bii-Aaden on tampa fota, mawbe ben e hooreebe *yottinoobe sadaka ben e jannoobe fii Sariya on ben fow wikkoo mo, o waree, o immintinoyee ka nalaande tammere.»

23 Onsay o wi'i be fow wonde: «Kala faalaado jokkude lan, yo o hayfintino, o yetta pande woo pande *leggal makko altindiraangal ngal,^p o jokkammi. **24** Kala faalaado dandude ngurndan mun, d^uan hayriray mo, kono kala non mo ngurndan mun hayriraa sabu an min, haray ontigi dandoyay d^uan. **25** E ko nafa honfun woodani neddo hebugol aduna on fow si o hayrintinike maa si o halkitike kanko tigi? **26** Awa kadi, kala hersir^do lan, hersiri kongudi an d^uin, Bii-Aaden on kadi hersiro^yay mo tuma o ardoiⁱ e mangural makko ngal e mangural Baabaajo on wondude e malaa'ikaabe laabu^be ben. **27** Mido wowlande on goonga, no woodi wo^bbe e mon onon wonbe doo ben, be maayataa ado be yi'ude laamu Alla ngun.»

*Fii Waylannde Mbaadi Iisaa ndin
(Mat. 17.1-8; Mrk. 9.2-8)*

28 Bay wa balde jeetati feyyii bawto yewtugol mo be d^uin kongudi, onsay o noddi Petruusu e Yuuhanna e Yaaquuba, be yahi ka fello fii toragol Alla. **29** Fewndo ko o torotoo, mbaadi yeeso makko ngon waylii, dolokke makko on wonti daneejo jalbudo. **30** E nder d^un, yimbe

^p **9:23** 9.23 «Yettugol leggal mun altindiraangal ngal» ko hebilagol jokkugol Iisaa haa maaya.

dido feeji no yewtida e makko, tawi þen-le ko Muusaa e Iiliya. ³¹ Ben no feenidi e annoora, hibe yewta fii yaadu makko sakkitordu ndun Yerusalaam. ³² Tawi Petruusu e wondibbe mun ben no soyyaade, kono be ñonti, be yi'i annoora Iisaa on e ben yimbe dido be o wondunoo e mun. ³³ Fewndo bee yimbe dido seedata e Iisaa, Petruusu wi'i mo: «Karamoko'en, no moyyi ka wonen doo. Darnen togooji tati, onon wonndu, Muusaa wonndu, Iiliya kadi wonndu.» Tawi kanko Petruusu o andaa ko o woni wowlude.

³⁴ Wa fewndo ko o wowlata dfun, duulere ari buumi be. Ko nden duulere buumata be, be huli. ³⁵ Onsay hawa yalti ka duulere, no wi'a: «Oo doo ko Biddo an Subaadø on. Heditee mo!» ³⁶ Bay ngol ewol wadii, be tawi ko Iisaa tun lutti don. Taalibaabe þen mari dfun fanki. Be fillitanaaki hay gooto kon ko be yi'i don e nder ðen balde don.

*Fii no Iisaa Selliniri Paykun Jinnaakun
(Mat. 17.14-18; Mrk. 9.14-27)*

³⁷ Bimbi nden jande ko be jippotoo ka ley fello, jamaa moolanaado ari fottugol e Iisaa. ³⁸ Onsay gorko goo ewnii ka hakkunde jamaa ton, o wi'i: «Karamoko'en, mi torike on tenyinee oo biddo an, ko fii ko bajjo an on nii. ³⁹ Nde jinnawii ngin nangi mo woo, o sonkay, o iiroo, o yaltina ngurda. Ngii letta mo, awa kadi ko karahan ngii yaltirta e makko. ⁴⁰ Mi torike taalibaabe mon ben radagol ngii jinnawii, kono be waawaali.»

⁴¹ Iisaa jaabii, wi'i: «Onon ko on jamaanu boyliingu ngu gomdfinaa. Ko haa honde tuma mi

wondata e mon, mido mujjanoo on? Awa addu doo bidso maa on.»

⁴² Wa ko o bannata paykun kun, jinnawii ngin libi kun ka leydi, kun iirii. Kono Iisaa tonjani ngii. Onsay o sellini paykun kun, o jonniti kun ben makkun. ⁴³ Fow naldi fii mangural Allaahu on.

*Fii no Iisaa Hiitorri fii Mayde mun nden
(Mat. 17.22-23; Mrk. 9.30-32)*

Wa fewndo ko fow naldidi e ko o wadaynood kon kanko Iisaa, onsay o wi'i taalibaabe ben:

⁴⁴ «Onon heditee fota dii kongudi doo: Bii-Aaden on janfoyte, wattee e juude yimbe ben.»

⁴⁵ Kono hari taalibaabe ben alaa faamude din kongudi, sabu hari hisdi wirnanii be fii wota be andu ko di firi. Awa kadi hari hibe huli landitagol mo di.

*Fii Burdo Teddude on e Hakkunde Mabbe
(Mat. 18.1-5; Mrk. 9.33-37)*

⁴⁶ Onsay yeddondiral wadi hakkunde mabbe fii andugol ko hombo e mabbe buri teddude.

⁴⁷ Nde tawnoo Iisaa kanun no andunoo din miijooji mabbe, o yetti paykun, o joddfini takko makko. ⁴⁸ Onsay o wi'i be: «Kala jabudo kun paykun e innde an, haray ko min o jabi. Awa kadi kala jabudo lan, haray ko Nuludo lan on o jabi. Ko fii ko burdo fandude on e mon woni teddudo.»

⁴⁹ Yuuhanna yetti haala kan, wi'i: «Karamoko'en, men yi'ii godso no radoo jinnaaji e innde mo'on. Men tonjani mo d'un, bay o wondaa e amen fii jokkugol on.»

⁵⁰ Onsay Iisaa wi'i mo: «Wota on toŋan mo dfun. Ko fii kala mo wonaa gapo mon, haray ko gido mon.»

Fii no Samariyankeebe ben Salornoo Tolnude Iisaa

⁵¹ Bay wonii balde de Iisaa ittetee ka aduna doo den hewtii, o fibi anniyeer yahugol Yerusalaam. ⁵² O immini wobbe ko hikkoo yeeso makko, ben yahi haa e hodo Samariyankeebe goo fii ebbindanagol mo don kanko Iisaa. ⁵³ Kono ben yimbe jabaali mo tolnude, bay ko Yerusalaam o sutii. ⁵⁴ Bay be yi'ii dfun, Yaaquuba e Yuuhanna wi'i Iisaa: «Koohoojo amen, hidon faalaa yo men wi'u yo yiite ngen iwu ka kammu ara mula bee?» ⁵⁵ Onsay Iisaa fewti e mabbe, feli be fota. ⁵⁶ Ontuma be yaari e hodo goo.

Fii ben Faalaabe Jokkude Iisaa (Mat. 8.19-22)

⁵⁷ E nder ko be yahata kon, goddo wi'i mo: «Mi jokkete kala ka yaarudaa.»

⁵⁸ Iisaa jaabii mo, wi'i: «Ndoni din no mari gayde mun, awa kadi colli din ka weeyo no mari nakkaaji mun, kono Bii-Aaden on kan alaa hay ka fowtina hoore mun nden.»

⁵⁹ Iisaa wi'i goddo goo: «Jokkan!»
On jaabii mo: «Koohoojo, newnanee lan taho, mi yaha mi wattinoya ben an en.»

⁶⁰ Kono Iisaa jaabii mo, wi'i: «Accu maybe ben wattina maybe mun ben, kono an yahaa fejninyaa fii laamu Alla ngun.»

61 Goddo goo kadi wi'i mo: «Koohoojo, mi jokkay on, kono newnanee lan taho, mi yaha mi waynoyoo beynguure an nden.»

62 Iisaa wi'i ondon kadi: «Kala fawudo jungo mun e hoore keri sarin, ontigi yeeyitii baawo, haray on nafataa laamu Alla ngun.»

10

*Fii no Taalibaabe ben Cappande Njeedido e Dido Nuliraa
(Mat. 10.5-14)*

1 Bay feyyii e dfun, Koohoojo on todđii fahin taalibaabe cappande njeedido e dido. O imminiri be dido dido ko yaha adoyoo mo e ca'e den fow e kala nokkeeli di o rewoya e mun. **2** O wi'i be: «Baagol ngol no dzuudi, kono wa'oobe ben dzuudaa. Awa jooni, toree non Jom baagol ngol yo o addu wa'oobe ka baagol makko. **3** Jooni mido imminirde on wa baaloy e hakkunde caapaali, yahee. **4** Awa kadi wota on yoobo bonfohun kaalisi maa sasa maa padé goo, hara kadi on hiwraaki hay gooto ka hoore laawol. **5** Kala suudu ndu naatoton e mun, wi'ee taho: «Yo buttu wonu e nduu suudu!» **6** Si bii-buttu no e nder ndun suudu, buttu mon on juuroto mo. Si ko liddu mun, on buttu wontanay on. **7** Tabitee e ndun suudu don, naamon yaron ko be okkori on don woo, ko fii golloo wo no handi e njoddi mun, hara on wadaali naata e nduu yalta e nduu.

8 «Kala saare nde naatudon e mun tolnadon, naamee ko bannanadon kon. **9** Sellinon jawbe be tawdon don ben, wi'on be wonde *laamu

Alla ngun badike be. ¹⁰ Kono kala saare nde naatudon e mun, be salii on tolnude, yahee ka fottirde mabbe, wi'on: ¹¹ «Men fidday e mon mbullaari saare mon nangundi men ndin e koyde! Kono andee tun wonde, laamu Alla ngun badike!» ¹² Mi andinii on, jande jaawoore nden ko ndee saare *Saduumma buretee hoynaneede edii nden saare d'fon.

¹³ «Bone wonanii ndee saare Kuuraziin e ndee saare Bayti-Sa'iida! Ko fii si tawno d'ii kaawakeeji moyyi wadfunoodi ka mon, ko non wadirnoo e dee ca'e Tiiri e Siduuna, harayno neebii ko jeyaabe e den ca'e bornii conci heynordi, be wujitiindoondi fii hollugol wonde be tuubii. ¹⁴ Ko d'un wadii, jande jaawoore nden ko Tiiri e Siduuna buretee hoynaneede edii onon. ¹⁵ Onon non, bee be Kafernahuum, hidon sikka fii mon bantete haa ka aljanna? Oo'o, on bugete ka jahannama.

¹⁶ «Kala heditiido on onon bee taalibaabe an, haray ko min o heditii. Kala bugitiido on, haray ko min o bugitii. Awa-le kala bugitiido lan, haray ko Nuludo lan on o bugitii.»

¹⁷ Ben cappande njeedido e d'ido artidi e weltaare, be wi'i: «Koohoojo amen, hay jinnaaji d'in yankinanike men e innde mon!»

¹⁸ Onsay o wi'i be: «Mi yi'ayno Ibuliisa no iwa ka kammu yanira wa farpitere. ¹⁹ Awa mi okkii on bawgal tippugol e bolle den e jahe den e kala bawde gajo on, hara hay fus hebaali on. ²⁰ Wota on weltor ko jinnaaji d'in yankinanii on kon. Kono weltoree ko inde mon den windaa ka kammuuli kon.»

*Fii Weltaaare Iisaa nden
(Mat. 11.25-27, 13.16-17)*

21 Ko e on saai' d'on tigi, Iisaa hebi weltaare fota immorde e *Ruuhu Seniido on, o wi'i: «Mi yettii ma yo Baaba, Jom leydi e kammu, fii koo ko wirnandaa d'un ben faamube e bee gandidube, fejnjinandaa d'un bee faybe. Hiiyii, ko fii ko d'un wonnoo yidi maa on yo Baaba.

22 «Awa, Baaba an wattii fow e juude an. Awa kadi hay gooto andaa ko hombo woni Biddo on si hinaa Baabaajo on, wano tawiri non kadi hay gooto andaa ko hombo woni Baabaajo on si hinaa Biddo on e on mo Biddo on faalaa mo fejnjinande.»

23 Onsay o fewtiti taalibaabe ben o wi'i be e qunuutu: «Gite yi'ude ko yi'udon kon malii!

24 Ko fii mi andinii on, annabaabe e lambe buy faalano yi'ude koo ko wondon yi'ude, kono be yi'aali. Be faalano kadi nanude koo ko wondon nanude, kono be nanaali.»

Misal Yettaangal e Samariyankeejo Moyyo on

25 Onsay godso e waawube fii Sariya ben immii landii mo fii ndarndagol mo, o wi'i mo: «Karamoko'en, ko hondun mi haani wadude fii yo mi hebu dan *ngurndan poomayankejan?»

26 Onsay Iisaa wi'i mo: «Ko hondun windii ka defte Sariya? Ko honno faamirdaa d'un?»

27 O jaabii mo, o wi'i: «Yo a yidir Alla Joomiraado maa on bernde maa nden fow e wonkii maa kin fow e doole maa den fow e

hakkil maa kin fowŋ, yidiraa nokondo maa on wano yidirdaa hoore maa non.»p

²⁸ Onsay Iisaa wi'i mo: «A jaaborii no moyyiri. Warru non, a hebay dan ngurndan.»

²⁹ Kono tawi on no faalaa hollude peewal mun ngal, o wi'i Iisaa: «Ko hombo non woni on nokondo an?»

³⁰ Iisaa jaabori mo nii, o wi'i: «Goddo no iwraynoo Yerusalaam, no yaha Yeerikoo. O hawrondiri e wuybe, ben boori mo, piyi mo haa moggo mayde, be yahi, be acci mo don. ³¹ Hawrondiri *yottinoowo sadaka no feyyaynoo don, o yi'i oo nedđo, o takkii mo, o feyyi. ³² Fahin *Lewiyankeejjo ari tawi mo don, on kadi yi'i mo, takkii mo, feyyi. ³³ Kono Samariyankeejo wondo e nder safaari mun, ari tawi mo, yurmaa mo. ³⁴ Onsay o badii, o juurani mo njaram e nebban ka barmeeji, o habbi. Onsay o wadi mo ka mbaddateeri makko, o nabi mo haa e suudu hobbe, o dankii mo. ³⁵ Bimbi mun, o yetti *dinaruuji didi, o jonni jom suudu hobbe ndun, o wi'i mo: ‹Dankor mo dii doo. Kala ko fawoydaa e hoore dii doo, mi yobitoyte tuma mi rewtoyi.›»

³⁶ Ontuma Iisaa wi'i: «Ko hombo e bee doo tato woni nokondo oo mo bee wuybe yani e mun?»

³⁷ On waawudo fii Sariya jaabii, wi'i: «Ko yurmaado mo on.»

Onsay Iisaa wi'i mo: «Yahu an kadi warraa non.»

Fii no Mariyat e Mariyama Werniri Iisaa

³⁸ Fewndo Iisaa e taalibaabe mun ben wonnoo e hoore laawol, be naati d'on e hodo. Debbo wi'eteedo Mariyatu werni be ka mun. ³⁹ Tawi on no mari neene-gooto wi'eteedo Mariyama, on joodii e ley koyde Koohoojo on no hedifoo kongudi makko din. ⁴⁰ Tawi Mariyatu kajun no jindidude e muraadi nder suudu din. Onsay o ari, o wi'i: «Koohoojo an, on kippataa fii ko oo neene-gooto an accidimmi e dee golle doo kon fow? Wi'anee lan mo yo o wallito lan!»

⁴¹ Koohoojo on jaabii mo, wi'i: «Mariyatu, Mariyatu! Hida maapii aani fii piiji d'uudsudi. ⁴² Kono ko huunde wootere tun hitti. Mariyama kajun subike ko buri hittude kon, dun-le o jabitantaake d'un.»

11

*Fii no Taalibaabe ben Haani Tororde Alla
(Mat. 6.9-13, 7.7-11)*

¹ Nande goo tawi Iisaa no toraade Alla nokku goo. Bay o gaynii toraade, goddo e taalibaabe makko ben wi'i mo: «Koohoojo, tindinee men no torortee wano Yaayaa tindinirnoo non taalibaabe mun ben.»

² Onsay o wi'i be: «Nde hidon toroo, on wi'iray nii:

«Baaba,

yo innde maa nden hormore,
yo laamu maa ngun feepu.

³ Okkor men nande woo jaametee haanando men on.

⁴ Yaafanodaa men junuubaaji amen din,
wano menen kadi men woni yaaforande kala bonnudo men.

Wota a naadu men e jarrabuyee.»

⁵ O wi'i kadi: «Si goddo e mon aru e immaade tumbere jemma, yaha ka njaatigi mun, o findina mo, o wi'a mo: «Njaatigi, nawlan bireediije tati, ⁶ ko fii mido hebi kodo ka jemma doo, mi alaa hay fus ko mi okkora mo.»

⁷ «Si on non mo o findinoyi wi'ii mo: «Mi torike ma wota a finnan, ko fii a taw mi falii baafal ngal, min e faybe an ben men waalike. Mi waawataa immaade fewndo doo, mi jonne bireedi!» ⁸ Mi andinii on, hay si o immaaki, o jonnira mo sabu njaatigiyagal wongal hakkunde maabbe ngal, o jonniray mo kala ko o handi sabu ko on torotoodo habbitori angal hersa kon.

⁹ «Min-le mi wi'ii on: Toree, on okkorte. Dabbree, on hebay. Hoddee, on udditante. ¹⁰ Ko fii kala toriido okkorte, kala dabbudo hebay, awa kadi kala on hoddiido udditante.

¹¹ «Ko hombo e mon, biddo mun torootoo dun bireedi, ontigi jonna mo hayre? Maa o toroo mo lingii, ontigi jonna mo mboddi? ¹² Maa o toroo mo woofoonde, o jonna mo yaare? ¹³ Si tawii non hay onon bonbe ben, hidon waawi wadande bibbe mon ben piiji moyyi, haray ko haa honto Ben mon Wondo ka kammu on okkorta ben toriibe mo *Ruuhu Seniido on!»

*Fii no Iisaa Radori Jinnaaji din
(Mat. 12.22-30; Mrk. 3.22-27)*

¹⁴ Nande goo Iisaa radii jinnawii mbobindinngii goddo. No ngii yaltirnoo e ontigi, o wowli, jamaa wonnoodo don on fow mugaa. ¹⁵ Wobbe e maabbe wi'i: «Ko e immorde e *Balzabuula lando jinnaaji din o woni radorde

jinnaaji din!» ¹⁶ Wobbe goo kadi fii ndarndagol mo torii mo hollugol be maande iwrunde ka kammu.

¹⁷ Nde tawnoo himo andi din miijooji mabbe, o wi'i: «Kala laamateeri liddondirndi, kayri tigi ndi caabay. Awa kadi si suudu liddondirii, ndu lancoto. ¹⁸ Onon hidon wi'a ko tippude e Balzabuula mi woni radorde jinnaaji din. Si tawii non Ibuliisa liddike hoore mun tigi, ko honno laamateeri makko ndin tabitirta? ¹⁹ Si tawii non wonii min ko tippude e Balzabuula mi radorta jinnaaji din, dun haray onon be mon ßen non ko tippude e hombo be radorta di? Ko dun wadi si kambe tigi be jaawoyay on. ²⁰ Kono si tawii ko tippude e bawgal Alla ngal mi woni radorde jinnaaji din, haray *laamu Alla ngun arii haa e mon.

²¹ «Nde neddo dolnudo jom aalaaji ayni galle mun woo, jawle mun ßen daday. ²² Kono si tawii burdo mo doole arii, yanii e makko, foolii mo, o jabitay din jogaaji di o hoolornoo, o sendita ßen jawle makko.

²³ «Kala mo aldaa e an, haray ko gano an, awa kadi kala mo wallataa lan moobitude, haray ko saakoowo.

²⁴ «Nde jinnawii yalti e neddo woo, ngii ham-miray ka wulaa, hara hingii ßabba nokkuure fowtorde. Si ngii tawii ngii hebaali, ngii wi'ay: «Yo mi yiltito ka suudu ka mi iwnoo ßon.» ²⁵ Nde ngii hewtiti, ngii tawa ndun suudu fittaama labbinaama. ²⁶ Onsay ngii yahay, ngii ßabboyaa jinnaaji jeedidi burdi ngii hunyude, di naata

don, dī hoda. Onsay sakkitorde on neddo buray aranun dfun bonude.»

²⁷ Fewndo ko Iisaa yewtaynoo dfun, debbo ewnii ka hakkunde jamaa ton, wi'i: «Maloore wonanii nduu reedu saawundu ma e din endi dī muynudaa!»

²⁸ Kono Iisaa jaabii, wi'i: «Maloore wonanii kan ben hedotoobe daaluyee Alla on, doftoo mo!»

*Fii Maande Annabi Yuunusa nden
(Mat. 12.38-42)*

²⁹ Nde tawnoo jamaa on no beydaade tun, onsay kanko Iisaa o wi'i: «Nguu jamaanu doo ko jamaanu bonngu, hingu dabba maande. Kono ngu jonnetaake maande si hinaa sifa ndee nde Yuunusa. ³⁰ Ko fii ko wano Yuunusa wonirannoo yimbe ndee saare *Niinawa maande non, ko wano non *Bii-Aaden on kadi woniranta nguu jamaanu doo maande. ³¹ Nande jaawoore nden, nde yimbe nguu jamaanu doo no naawee woo, onsay oo debbo laaminoodo ndii leydi hikkorndi ka sengo jaamo immoyto, naawoya be sabu iwugol mo haa ka kattudi leyde, ara hedfitoo ngun faamu Sulaymaana, hara-le burdo Sulaymaana no doo. ³² Awa kadi nande jaawoore nden, nde yimbe nguu jamaanu doo no naawee woo, yimbe Niinawa ben kadi immoyto, naawoya be sabu ko be hedfinoo waaju Yuunusa ngun, be tuubi, hara-le burdo Yuunusa no doo.»

*Misal Yettaangal e Lampu
(Mat. 5.15, 6.22-23; Mrk. 4.21)*

³³ «Hay gooto hubbintaa lampu suuda mo maa hippa mo e ley siyonwal, kono o waday mo e

kene fii no naatoobe ben yi'ira ndaygu ngun.
 34 Ko yiitere maa nden woni ndaygu bandu ndun.
 Si tawii yiitere maa nden no selli, haray bandu
 maa ndun fow no ndaygi. Si tawii non yiitere
 nden no nawi, haray bandu maa ndun no e nder
 niwre. 35 Reenee wota ndaygu wongu e mon
 ngun wontan on niwre. 36 Si tawii bandu mon
 ndun no ndaygi, hara teral mon hay gootal alaa
 ka niwre, d'un haray bandu mon ndun fow no
 ndaygiri wa nde ndaygu lampu jalbi e mon.»

Fii no Iisaa Hajori Fariisiyaabe ben
(Mat. 23.1-36; Mrk. 12.38-40)

37 Wa fewndo ko Iisaa yewtaynoo d'un, *Fariisiyaajo goo torii mo yo be yaadu ka makko, be hirtodoya. Onsay o naati, o joodi fii jaamugol.
 38 Kono Fariisiyaajo on ηaldī ko Iisaa toolii fii jaamugol kon soodaaki. 39 Onsay Kooahoojo on wi'i mo: «Onon bee Fariisiyaabe, ko baawo miranji din tun labbinton, hara hidson heewi miile e bonki. 40 Onon ko on faadfa-hakkilbe, hara hinaa Tagudo baawo on tagi nder on kadi?
 41 Okkoree waasube ben ko woni ka nder kon, onsay ko heddi kon fow laabanay on.

42 «Kono bone wonanii on, onon bee Fariisiyaabe, bay hidon ittana naana e suukooran e kala tutateeriji wondi e naakoo farilla, hara hidon welsindanii peewal ngal Alla yedata ngal e giggol makko ngol. Hara-le ko d'un haanunodon jokkude, tawa kadi on welsindaaki e ko heddi kon.

43 «Bone wonanii on, onon bee Fariisiyaabe, bay hidon yidi saffawol aranol ngol ka juulirde e hiwreede ka fottirde.

44 Bone wonanii on, bay hidon wa'i wa genaale de aldaa e maande, dē godſo rewata e mun hara andaali!»q

45 Onsay godſo e hakkunde waawube fii Sariya ben yetti haala kan, wi'i mo: «Karamoko'en, si on maakirii nii, haray on aybinii men menen kadi!»

46 Ontuma Iisaa jaabii mo, wi'i: «Bone wonanii on onon kadi bee waawube fii Sariya, bay hidon fawa yimbe ben dolle de be waawataa nabude, hara onon on fopportaa ḫun hay hoore hondu fii wallugol be.

47 «Bone wonanii on, bay hidon maha maandina genaale annabaabe ben, hara-le ko baabi-raabe mon ben sahinbini be. **48** Dun no seedintini wonde hidon newni ḫen kuude ben baabi-raabe mon, bay ben sahinbiniino annabaabe ben, onon kadi hidon mahude maandina genaale maabbe den. **49** Ko ḫun wadi si Alla, Jom faamu on, no daalunoo: ‹Mi nabanay be annabaabe e nulaabe, be wara wobbe e ben, be tam-pina beya ben›, **50** fii no nguu jamaanu doo yantiroyee yiyan annabaabe hibbanoodan dan gila ka fuddoode aduna, **51** ḫun ko gila e yiyan Haabiila dan haa addani e yiyan Zakariyaa dan, on waranoodo hakkunde *layyorde nden e

q **11:44** 11.44 Tippude e Sariya Muusa on, si godſo meemi furee maa o rewii e yenaande, haray o wonii harmudo. Lew. 21.11, Ada. 19.11

*juulirde mawnde nden. Mi andinii on, pellet nguu jamaanu dfoo yantoyte fii dfun.

⁵² «Bone wonanii on, onon bee waawube fii Sariya, bay on suudii saabiwal gandal ngal, on naataali, awa kadi on jabaali faalanoobe naatude ben naata!»

⁵³ Bay o yaltii d'on, jannoobe fii Sariya on ben wondude e Fariisiyaabe ben fuddii mo monanaade, landoo mo lande duudude, ⁵⁴ wadana mo pirci, fii tun no be nangira mo immorde e kongudi makko din.

12

Fii Hajanne e Waaju

(Mat. 10.26-28)

¹ Wa fewndo onsay, tawi yimbe guluuje guluuje moobondirii haa hibe yaabindira. Onsay lisaatii wi'i taalibaabe mun ben: «Reenee e lewen *Fariisiyaabe ben, d'un ko faasiqankaaku ngun. ² Alaa ko suudii ko feenataa, awa kadi alaa gundoor mo andotaako. ³ Ko d'un wadi, kala ko wowludon ka niwre feenay palorma teedsan, e kala ko sowndidion ka cuudi ewnorte ka warpakke.

⁴ «Mi andinii on yo yiibbe an, wota on hulu waroobe bandu ben, toonin d'un alaa ko be waawi. ⁵ Mi hollay on On mo gasoton hulude: hulee on Mardo bawgal warugol bugoo ka jahannama nde wari. Mi andinii on, ko on Mardo bawgal wadugol d'un haanudon hulude. ⁶ Hinaa seresereejii jowi no yeeyee tammaaji fidii? Kono Allaahu on kapun yejjitaa hay gootun e majji. ⁷ Hay cukuli ko'e mon den fow no limaa. Wota

on hulu, ko fii hidon buri seresereeji buy hittude ka Alla.

⁸ «Mi andinii on, kala qirritiido fii an yeeso yimbe ben, *Bii-Aaden on kadi qirritooyo fii makko yeeso malaa'ikaabe Alla ben. ⁹ Kono kala yeddudo fii an yeeso yimbe ben, fii ontigi yeddyote e yeeso malaa'ikaabe Alla ben. ¹⁰ Kala wowludo Bii-Aaden on ko boni, no ara ka yaafanee. Kono kala hoynudo *Ruuhu Seniido on yaafantaake.

¹¹ «Tuma noddadon ka juulirde e yeeso mawbe ben e laamiibe ben, wota on jiboyo ko jaabodon maa ko wi'on. ¹² Ko fii don kisan Ruuhu Seniido on tigi longinay on ko gasoton yewtude kon.»

Fii Galo Faada-Hakkiljo

¹³ Godfo e hakkunde on jamaa wi'i Iisaa: «Karamoko'en, maakanee ben-gooto an on yo men sendodu ndondi amen ndin.»

¹⁴ O jaabii on neddo, o wi'i: «Ko hombo wadimmi naawoowo maa sendanoowo on?» ¹⁵ O watti e d'un: «Reenee wattanon yiila e kala miile, ko fii ko aaden aldi woo, ngurndan makko dan hinaa e d'un humii.»

¹⁶ Onsay o wadani be ngal misal doo, o wi'i: «No woodunoo neddo aldfuso mo toore leydi mun moyyiri d'un fota. ¹⁷ Tawi on neddo no miijotonoo, wi'a: ‹Ko honno mi wadata, ko fii mi alaa ka mi wada ngal copal an?› ¹⁸ O wi'itii: ‹E hino ko mi wadata kon: Mi lancay tumusuuje an d'en, mi moyyina burde de njandude ka mi loowa nende an d'en e piiji an din fow. ¹⁹ Jooni yo wonkii an, bay mido mari jawle buy ko

yonatammi e nder duubi buy, yo mi fowto, mi jaama, mi yara, mi weltoo!»

²⁰ «Kono Allaahu on wi'i mo: «Ko an yo faadsa-hakkiljo, e nder oo jemma doo tigi a yantete wonkii maa kin. E hara koo ko faandidsa, ko hombo d'un wontanta?»

²¹ «Awa ko nii woniranta kala on moobudo jawle e baawo aldangol Alla.»

Fii Hakkunde Anndeiji e Keyeeji

(Mat. 6.25-34)

²² Onsay Iisaa wi'i taalibaabe mun ben: «Ko d'un wadi si mi wi'ay on wonde, wota on aanu fii ko jaamon e nder ngurndan mon dan maa fii ko bornon balli mon din. ²³ Ko fii ngurndan no buri neema, awa kadi bandu no buri koltu. ²⁴ Ndaaree kayakayaaji din: dii sankataa, di wa'ataa, di alaa tumusuuje e caagaaje, kono Allaahu on no wurni di, hara-le hidon buri colli din hittude. ²⁵ Ko hombo e mon e nder annde mun waawata beydude ngurndan mun dan beru sogonal? ²⁶ Si tawii non on waawataa hay ko buri lo'ude kon, haray ko hondun aananton fii ko lutti kon?

²⁷ «Ndaaree no dii piindiji fudirta njanda, hara-le dii gollataa, dii sajnataa. Kono non mi andinii on, hay Sulaymaana e nder darja mun on fow holtiraali hay wa wootiri e majji. ²⁸ Si tawii non Allaahu on no holtinirde non hay hudo wonuko hande ka ngesa kon, bugoyteeko jango ka yiite kon, hara o ronkay wafande on ko buri d'un, onon bee fanda-gomdfinalbe? ²⁹ Onon non wota on yango fii ko jaamon maa ko yaron, wota fii d'un maapin on. ³⁰ Ko fii d'un fow ko

be gomdinaa ka aduna ben dabbata dun. Kono Ben mon Wondo ka kammu on no andi hidson handi e dun. ³¹ Kono dabbbee tun laamu makko ngun, din piiji fow beydanoyte on.

³² «Ko onon yo wuro tosooko, wota on hulu fus, sabu Ben mon Wondo ka kammu on tawii no wela mo ka o yeda on laamu ngun. ³³ Yeeyee ko jeydon kon, okkoron miskinbe ben, moyyinee bonfooji di hiddataa, dun wonanay on keyee mo lannataa ka kammuli, don mooyataa, awa kadi ngujjo meemataa. ³⁴ Ko fii ko ka keyee mon on woni woo, bernde mon nden wonata.»

Fii Reenugol e dow Hebulaare

³⁵ «Wonee hebuliibe,^r hara lampuuji mon din no hubbi. ³⁶ Wa'on wa nde jiyaado tijjii jom mun, hara ko yahudo peera, hara no on hewtitiri hoodii, o udditanay mo. ³⁷ Ben jiyaabe malii nde jom mabbe ari tawi hibe aynude. Ka haqiiqa mi andinii on, jom ben daditoto, o bannana be ko be jaama. ³⁸ Ben jiyaabe be jom mun tawi no ayna tumbere jemma maa ka tatabal jemma, haray ben malii. ³⁹ Ko fii andee fota, si tawno jom galle no andunoo nde ngujjo on araynoo wujjugol, haray o accataano galle makko den fusee. ⁴⁰ Awa onon kadi hebilee, ko fii Bii-Aaden on aroyay e saa'i nde on sogitaaki.»

Fii Jiyaado Holniido e Jiyaado Bondo (Mat. 24.45-51)

⁴¹ Onsay Petruusu wi'i mo kanko Iisaa: «Koohoojo amen, hara ngal misal doo ko fii amen tun kaa ko fii yimbe ben fow?»

^r **12:35** 12.35 Maa: «daditiibe».

⁴² Koohoojo on jaabii mo, wi'i: «Hara ko golloowo hombo reeniido holniido woni ko jom mun halfinta neemingol kurkaadi mun din e saa'i haanudo? ⁴³ Maloore wonanii on jiyaado mo jom mun ari tawi no jokkiri non. ⁴⁴ Ka haqiqa mi andinii on, o halfinay mo jawle makko d'en fow. ⁴⁵ Kono si on jiyaado wi'itike: ‹Jom an neebii araali›, onsay, o nangana tilfugol kurkaaduube ben worbe e rewbe e naamugol yara haa mandila, ⁴⁶ jom on jiyaado aray nde on jiyaado sabbaaki mo e saa'i mo o sogitaaki, o letta mo lette sattude, o wada mo ka be gomdfinaa ben wadetee ton.

⁴⁷ «Jiyaado andudo faaleeji jom mun din, kono o ebbindaaki, maa o wadsaali faaleeji jom makko din, o piyete piggal duudsungal. ⁴⁸ Kono si tawii non ontigi andaa faale jom mun on, o wadii kuude foddude e donkineede, o foccete ko hawri. On okkoraado ko duudi yantete ko duudi, awa kadi on halfinaado ko duudi landitoyte ko burti.»

Fii Liddondiral (Mat. 10.34-36)

⁴⁹ «Mido ari bugagol yiite e oo aduna, mi faalete hara nge hubbii! ⁵⁰ Kono no woodi loyegol ngol mi loyoytee, e maanaa d'un ko tampere, doo yo d'un sollitanan, haray mido sonjii. ⁵¹ E hara on sikku ko addugol buttu e oo aduna mi arani? Oo'o, hinaa d'un, kono ko liddondiral mi addi. ⁵² Ko fii gila jooni njowo wondube e nder suudu be woncondiray, tato liddondiray e beya d'ido, beya d'ido kadi liddondira e beya tato. ⁵³ Baaba liddondiray e biddo, biddo liddondira

e baaba, neene liddondira e jiwo mun, jiwo kadi liddondira e neene mun, debbo liddondira e esiraawo mun jiwo, jiwo on kadi liddondira e esiraawo mun debbo.»

Fii Faamugol Firo Saa'iiji

(Mat. 16.2-3)

⁵⁴ Iisaa wi'i kadi jamaa on: «No yiirudson duulere no immori ka hirnaange, on wi'ay kisan <ndiyen d'an aray>, d'un wonira non. ⁵⁵ Awa kadi no yiirudson hendlun iwrii sengo jaamo woo, on wi'ay <nguleendi ndin arii>, d'un kadi wasfa. ⁵⁶ Ko onon yo faasiqiibe, on waawii faamude fii ko feejni ka leydi kon e ko feejni ka kammu kon. Ko fii hondun non on waawaali andude oo saa'i fewndiido doo?»

⁵⁷ «Hara ko fii hondun onon on waawataa faamande hoore mon ko feewi kon? ⁵⁸ Nde an e mo habidufaa hidon yaha ka yeesoojo on woo, wasdu feere no faamondiriron ka laawol, fii wota o watte e juude jaawoowo on, on jaawoowo kadi watte e juude aynoobe kasongon, ben sokoye. ⁵⁹ Mi andinii ma, a yaltataa don fannamaa a yobaali mbuudu sakkitoro on.»

13

Ewol Tuubuubuyee

¹ Ko fewndo onsay, wobbe ari fillitanii Iisaa fii bee be Jaliilu be Pilaatu warnoo fewndo be hirsata daabeeji fii ittugol sadakaaji mabbe. ² O jaabii be kanko Iisaa, o wi'i: «Hara on sikku ben be Jaliilu no buri Jaliiluyankoobe ben fow junuubu bay be lettorii non? ³ Min mi wi'ay on - oo'o! Kono si on tuubaali onon kadi, on fow on

re'ay. ⁴ Kaa hara on sikkū bee sappoo e njeetato, be nduu suudu aynirdu ka maadi Siluwaama yani e mun wari, no buri bee be Yerusalaam luttube fow bakkatu? ⁵ Min mi wi'ay on - oo'o! Kono si on tuubaali onon kadi, on fow on re'ay.»

⁶ Onsay o wadani be ngal misal doo: «Tawi goddo no marnoo yibbehi ka tutateeri mun. O ari dābbugol bibbe e makki, o hebaali. ⁷ Onsay o wi'i gollanoowo mo on ka tutateeri: ‹Hebii nii duubi tati mido arude dābbugol bibbe e ngal leggal, mi hebaali. Hara ko nafa hondun ngal wonani doo? Jooni soppu ngal!»

⁸ «Kono golloowo on jaabii mo, wi'i: ‹Jom an, accee ngal doo ndee hitaande doo. Doo e dūn mi jasay binde maggall on fow mi wadana ngal polu. ⁹ No gasa ka ngal rima ko arata. Si ko liddu mun, onsay on soppoyay ngal.»

Fii no Debbo Jukkunnaajo on Selliniraa e Aseweere

¹⁰ Tawi jande goo Iisaa no jannaynoo e juulirde goo e *nalaande fowteteende nden, dūn ko asewe. ¹¹ Tawi no dōn debbo mo jinnawii jukkini hebii duubi sappoo e jeetati, himo turii, o waawataano bantaade few. ¹² Bay Iisaa yi'ii mo, o noddi mo, o wi'i: «Debbo, a sendaama e jukkere maa nden!» ¹³ Onsay Iisaa *fawi juudse mun dēn e makko. Don kisan debbo on feewi e darnde, o manti Allaahu on.

¹⁴ Kono yeesoojo juulirde nden seytini kon ko Iisaa jawndi jande asewe, o wi'i jamaa on: «No woodi balde jeegoo gaseteede golleede e mun. Aree jawndedon e dēn balde dōn, hara hinaa e nalaande asewe!»

¹⁵ Koohoojo on jaabii mo, wi'i: «Ko onon yo faasiqiibe! Hinaa mo kala e mo'on yaltinay nagge mun maa mbabba mun ka dingiraa mun nande asewe, naaba yarnoya? ¹⁶ Hara oo debbo iwdi Ibraahiima mo Ibuliisa habbi gila duubi sappoo e jeetati, haanaa ka o firtanee din kabbi nande nalaande fowteteende nden?»

¹⁷ Bay o yewtirii non, dun hersini aybe makko ben fow, kono jamaa luttudo on weltori dii piiji hittudi di o wadaynoo.

*Mise Yettaade e Abbere Bene e Lewen
(Mat. 13:31-33; Mrk. 4:30-32)*

¹⁸ O wi'i fahin: «Hara ko hondun *laamu Alla ngun nandi, maa ko hondun mi ebbindirta e maggu? ¹⁹ Hingu wa'i wa abbere bene nde goddo yetti, bugii ka suntuure mun. Nden fudi, wonti leggal ngal colli din ka weeyo arata hoda e caldi mun.»

²⁰ O wi'i kadi: «E ko hondun mi ebbindirta e laamu Alla ngun? ²¹ Hingu wa'i wa lewen mo debbo yetti, jillindiri e sariyaare tati condi farin, o piya fun, on lewen wona sabu dun fow yura.»

*Yewtere fii Damun Tosokun
(Mat. 7:13-14)*

²² Ko Iisaa yahaynoo Yerusalaam, o rewayno kodolun e kodolii hara himo waajoo. ²³ Goddo goo landii mo, wi'i: «Koohoojo, hara ko yimbe seedsaabe tun dandoytee?»

Onsay o wi'i be: ²⁴ «Etee no naatiron ka dambugal faadungal, ko fii mi andinii on, buy daabboyay no naatira don, kono be waawoytaa. ²⁵ Nde jom galle den immii ombi baafal ngal woo,

hara hidon ka yaasi, onsay on fuddoto honkande mo baafal ngal, wi'a: «Koohoojo, udditanee men!» O jaaboyto on, o wi'a: «Min mi andaa ko on be honto!»

²⁶ «Wi'on kadi: «Men jaamuno men yaridi e mon, awa kadi on waajotono ka d'ate amen.» ²⁷ O jaaboo on kadi, o wi'a: «Min mi andaa ko on be honto. Onon bee wadaynoobe ko boylii fow, pottitee lan!»

²⁸ «Tuma yi'udon Ibraahiima e Issaaqa e Yaaquuba e beya annabaabe heddiibe fow ka nder laamateeri Alla, tawa onon ko on bugoy-teebe ka yaasi, ka wullaandu e n'atindiro niiye woni ton. ²⁹ Iwroyte funnaange e hirnaange, nano e jaamo, be nafodoya ka laamateeri Alla. ³⁰ Awa andee wonde, no woodi baawoobe wontiroyaybe yeeso, wano tawiri non kadi no woodi yeesoobe wontiroyaybe baawo.»

*Fii no Iisaa Aaniran Yerusalaam
(Mat. 23.37-39)*

³¹ Ko e on saa'i d'on *Fariisiyaabe goo ari wi'i mo kanko Iisaa: «Yahu iwaa doo, ko fii *Heroodu no faalaa sahinbinde ma!»

³² O wi'i be: «Yahee holon ndun saafaandu: Mido radaade jinnaaji din, mi sellina n'awbe ben hande e jango, ka nalaande tammere haray timmanii lan. ³³ Kono bee mi seppa hande e jango e faddi-jango, ko fii haanaa ka annabaajo waree ko wonaa Yerusalaam.

³⁴ «Ee Yerusalaam! Ee Yerusalaam! Ko an yo saare sahinbinoore annabaabe, wariroore nelaabe e mun kaaye! Ko haa honto mi faalanoo moobude bee faybe maa wano gertogal moobirta

coppi e ley gabitti mun, e hin-le on jabaali dfun! ³⁵ Awa nokkuure mon nden eggaama. Kono mi andinii on, on yiitataa lan haa pande wi'oyton: «Yo barki wonan oo wondo arude e innde Joomiraado on!» »s

14

Fii no Iisaa Nawndiri Nawnudo Goo

¹ E *aseeweere goo, dun ko *nalaande fowte-teende nden, Iisaa naati e suudu hooreejo Fariisiyaabe ben fii nafagol, tawi ben Fariisiyaabe no tenyina mo. ² Tawi aaden buutudo no yeeso makko dson. ³ Onsay Iisaa landii waawube fii Sariya ben e Fariisiyaabe ben, o wi'i: «Hara no dagii ka nawndee e aseeweere kaa dagaaki?» ⁴ Kono be fow be deyyi. Onsay o yetti on pawdo, o sellini, o acciti mo, on yahi.

⁵ Onsay o wi'i be: «Ko hombo e mon, si bidso mun maa nagge mun aru e yanude e nder woyndu, salotoo nge yawnude maa yawna mo dson kisan fii nden pande ko asewe?» ⁶ Laatii be waawaali jaabaade hay huunde e dun.

Fii no Saatinirtee

⁷ Bay o yi'ii no ben saatinanoobe suboraynoo ndaddule yeesooje d'en, o wadani be ngal misal doo, o wi'i be: ⁸ «Si on aru e saatineede e peera, wota on wonu ka ndaddule yeesooje fii hita taw burdo on hittude no saatinaa dson ⁹ haa saatindo on on ara wi'a on: «Accanee oo doo ndaddudi ndin.» Onsay on hersay ruttagol ka ndaddudi baawoori. ¹⁰ Kono tuma saatinadon

woo, wontiree baawo fii tuma nde saatindo on on ari woo, yo o wi'u on: «Gido an, aru wonaa yeeso gaa.» Onsay d'un wonanay on teddungal e tawnde ben be saatindinafow. ¹¹ Ko fii kala mawnintiniido jippinoyte, awa kadi kala jippindo hoore mun mawninoyte.»

¹² Onsay kanko Iisaa o wi'i saatindo mo on: «Nde hisa soyyina maa hirtina woo, wota a saatin yibbe maa ben maa neene-gootooibe maa ben maa musibbe maa ben maa kawtalbe maa aldfube ben, fii wota kambe kadi be saatine nande goo, d'un wonane njoddi. ¹³ Kono nde wadataa caatal woo, saatin miskinbe ben e jukkunnaabe ben, e maanaa boofoobe ben e bumbe ben. ¹⁴ Dun a wonoyay malaado, ko fii ben alaa ko yobitire, a yobitoyte nande ummutal feewube ben.»

Misal Yettaangal e Saatinanoobe fi Nafagol (Mat. 22.1-10)

¹⁵ Bay goddo e be o nafodaynood ben nanii din kongudi makko kanko Iisaa, o wi'i mo: «Malooore wonanoyay on nafoytoodo ka *laamateeri Alla!»

¹⁶ Onsay Iisaa jaabii mo, wi'i: «Nande goo goddo waduno caatal moolanaangal, o saatini yimbe buy. ¹⁷ Bay nafagol ngol fewndike, o nuli kurkaadu makko ndun yo on yahu wi'a be o saatinnood ben yo ben aru, ko fii hebulaama.

¹⁸ «Kono be fow be kuylitidi. Arano on e mabbe wi'i ndun kurkaadu: «Mido soodi ngesa, bee mi yaha mi ndaaroya mba. Mi torike mo yo o yaafol lan.» ¹⁹ Goddo on wi'i: «Mido soodi kalali sappo, mido yahude mi lasindoo di, mi torike mo

yo o yaaf o lan.» ²⁰ Goddo goo kadi wi'i: «Mido jombi neebaali, ko d'fun hadata mi yaha.»

²¹ «Bay kurkaadu ndun hewtitii, o yottintini e jom makko ko o nulaa kon fow. Onsay jom galle on tikki, o wi'i ndun kurkaadu makko: «Yahu kisan e date d'en fow, njane e tosooke, addanoyaa mi miskinbe ben e jukkunnaabe ben e bumbe ben e boofoobe ben fow.»

²² «Kurkaadu ndun wi'i: «Jom an, ko yamirdon kon wadaama, kono haa jooni ka joodsee no lutti.»

²³ «Onsay jom galle den wi'i kurkaadu ndun: «Yahu haa ka fulawaa, takkodaa kowle d'en fow, rewaa e datoy koy fow, etodaa no yimbe ben arda fii no ka an heewira. ²⁴ Ko fii mi andinii on, hay gooto e bee be mi saatinnoo aranun mettotaako oo nafakka an!» »

*Fii no Iisaa Haanaa Jokkireede
(Mat. 10.37-38)*

²⁵ Tawi jamaa moolanaado no jokkondirnoo e Iisaa. O fewtiti be, o wi'i: ²⁶ «Si godfo arii e an, hara o woniraa selugol ben makko e yumma makko e beyngu makko e bibbe makko ben e neene-gootoobe makko ben worbe e rewbe haa nabani wonkii makko kin tigi, haray ondon waawataa wonude taalibaajo an. ²⁷ Awa kadi kala mo yettaali *leggal mun altindiraangal ngal jokkimmi, haray ontigi waawataa wonude taalibaajo an.^t

²⁸ «Hara ko hombo e mon si no faalaa darnude koore, ronkata joodaade taho, taskoo fii ko o ebfi kon si ko ko yonata? ²⁹ Kulol wota ootigi fusdo

^t **14:27** 14.27 «Yettugol leggal mun altindiraangal ngal» ko hebilagol jokkugol Iisaa haa maaya.

ronka gaynude, fii wota yi'ube mo e d'un ben fow jalu mo, ³⁰ wi'a: «Oo neddo fuddino darnude, kono o waawaali lannitaade!»

³¹ «Maa hara ko lando hombo fokkitanta habidoygol e lando goo mo konu mun woni embere yimbe guluuje noogayo, hara kanko ngu makko ngun ko embere yimbe guluuje sappo, ronkata joodaade taho, taskoo si o heboyay kutu maßbe? ³² Si o tawii non o heboytaa kutu maßbe bay oya no wodciti mo taho, o nelay e on fii yo on wadfan mo sartiji no buttu on tabitira. ³³ Ko d'un wadi, kala e mon mo woniraa seedugol e ko o jeyi kon, haray gasataa wonde taalibaajo an.

³⁴ «Landan ko huunde moyyere, kono si dakamme majjan on iwii, haray ko honno dakamme majjan on wattirtee? ³⁵ Haray dan alaa nafa ka leydi maa ka nolu, ko hawkoyteedan ka yaasi.

«Mo no mari noppi nanirdi yo nanu!»

15

Misal Yettaangal e Baalii Majjungii

(Mat. 18.12-14)

¹ Yantooobe sagalle ben fow wondude e junuubanke'en no badotonoo Iisaa fii hedagol mo. ² Fariisiyaabé* ben e jannoobe fii Sariya on no ȳunaynood hakkunde maßbe, wi'a: «Oo doo kapun bannitay junuubanke'en, naamida e maßbe!»

³ Onsay kanko Iisaa o wadani ben ngal misal doo, o wi'i: ⁴ «Ko hombo e mon si no mari baali teemedere, gootii e d'in majja, ronkata accude cappande jeenay e jeenayji d'in ka wulaa, yaha

dabbitoya majjungii ngin haa nde o yiitoyi ngii woo? ⁵ Nde o yiitoyi ngii, o wakkoo ngii e hoore weltare. ⁶ Nde o hewtiti ka makko, o nodditay yibbe makko ben e kawtalbe makko ben, o wi'a be: «Weltodee e an, ko fii mi yiitii baalii an majjunoongii ngin!» ⁷ Mi andinii on, ko wano non kadi weltare burirta woodude ka kammu sabu junuubankeejo gooto tuubudo, edii feewube cappande njeenayo e njeenayo be tuubuubuyee fawaaki d'fun.»

Misal Yettaangal e Tammaaru Majjundu

⁸ «Maa ko debbo hombo mardo tammaaji sappo, si wooturu e din majjirii mo, ronkata huubbude lampu, fitta suudu mun ndun, dabbitira hakkil haa nde o yiiti ndu woo? ⁹ Nde o yiiti ndu, o nodditay yibbe makko ben wondude e kawtalbe makko ben, o wi'a be: «Weltodee e an, ko fii mi yiitii tammaaru an majjunoondu ndun!» ¹⁰ Mi andinii on, ko wano non kadi malaa'ikaabe Alla ben weltorta tuma nde junuubankeejo gooto tuubi.»

Misal Yettaangal e Biddo Funsoowo

¹¹ O wi'i kadi: «Goddo no marnoo bibbe dido. ¹² Toolaajo makko on wi'i mo: «Baaba an, jonnee lan gebal an ngal mi haani hendoyaade ngal ka jawdi mon.» Onsay ben mabbe sendani be jawdi mun ndin.

¹³ «Bay balde feyyii, toolaajo on moobi ko o jeyi kon fow, o yahi e leydi woddfundi, o funsitoyi ton jawdi makko ndin fow e nder jiibaare. ¹⁴ Bay o lannii fewjande fow, heege tiifunge wadi e ndin leydi. Onsay o fuddaa ηakkireede. ¹⁵ O

halfinoyii e goddo goo jeyaado e ndin leydi, on nabi mo ka gese mun fii ko aynana d'un koseeji mun din. ¹⁶ Himo faaletenoo naamude neteeje de koseeji din naamaynood'en, kono hay gooto okkoraali mo.

¹⁷ «O luggini mijo, o wi'i: ‹Ko golloobe njelo ben an mari jaamoobe haa luttina, hara min mido maaya doo heege! ¹⁸ Jooni non, mido yiltitaade ka ben an, mi wi'a be: Baaben, mi wadii junuubu ka Alla, mi hebii hakkee mon, ¹⁹ mi foddaa e noddeede biddo mon hande kadi. Jogoree lan wa golloowo mon.›

²⁰ «Onsay o yiltitii ka ben makko. Bay o badike, ben makko haynii mo, yurmaa mo. Tun ben makko dogi, hirbii mo, lunnii. ²¹ Onsay on biddo makko wi'i mo: ‹Baaben, mi hebii junuubu ka Alla mi hebii hakkee mon, mi foddaa e noddeede biddo mon hande kadi!›

²² «Kono ben makko yamiri kurkaaduube mun ben, o wi'i be: ‹Yahee tinna addanon mo kattaane burdo fotude on bornon mo, wadfanon mo hurundaare ka hondu e pade ko o wattoo.› ²³ O wi'i be kadi: ‹Addoyee ga'un fayukun kun, hirson, naamen, weltoden. ²⁴ Ko fii hari oo biddo an doo ko mayso, kono jooni o wuuritii, hari kadi o majjii, kono jooni o yiitaama!› Onsay be woni e fijugol weltoda.

²⁵ «Dun hawrondiri afo makko on no ka ngesa. Bay on badike ka hodo fewndo ko o artata, o nani hito gimi e gami. ²⁶ Tun o noddi golloowo mabbe goo fii ko humpita mo kon ko woni wadfude ka mabbe. ²⁷ On golloowo wi'i mo: ‹Mijnan maa hewtitii. Bay non o hewtitii e jam,

ko sabu cfun ben maa en hirsiri ga'un fayukun kun.»

²⁸ «On seytini kisan, o salii naatude. Onsay ben makko yalti jeeji mo fii yo o naatu. ²⁹ Kono o wi'i ben makko: ‹E hino, wadii nii duubi buy mido yanganaade on. Haa hande mi yeddaali on. Minle hay nde wootere on okkaali lan hay be'un fii ko mi saatinira goreebe an ben. ³⁰ Kono bay oo biddo mon doo dekkudo ndii jawdi mon dekkidi ndi e wadoobe jinaa artii, ondon on hirsanii mo ga'un fayukun kun!»

³¹ «Ben makko wi'i mo: ‹An non boobo an, nande woo hidien wondi. Ko mi mari kon fow ko an jeyi. ³² Kono mi taw bee mi weltoo, mi wada welo-welo, bay hari oo mijnpiraawo maa doo ko maydo, kono jooni o wuuritii, hari kadi o majjii, kono jooni o yiitaama.› »

16

Fii Mbatulaajo mo Feewaa

¹ Iisaa wi'i taalibaabe mun ben kadi: «No woodunoo aaden galoo mardo mbatulaajo, tawi on mbatulaajo makko no jno'ira funsugol jawdi on galoo. ² O noddi on mbatulaajo, o wi'i mo: ‹Ko hondun mi woni nanude e hoore maa? Jittanan no wondaa gollirde, ko fii a waawataa wonude mbatulaajo an hande kadi.›

³ «Onsay mbatulaajo on wi'itii: ‹Hara ko hondun mi wadata jooni, bay jom an no ittude lan wonugol mbatulaajo makko? E hin-le mi maraa doole remugol, awa kadi toragol no hersinanii lan. ⁴ Mi andii ko mi wada fii yo mi

heboy ko wernammi ka mun tuma mi ittaa e mbatulayaagal.»

⁵ «Onsay o nodditi kala joganiibe jom makkoben. O wi'i arano on: ‹Ko jelu joganidaa jom an?›

⁶ On jaabii: ‹Ko tankonje teemedere nebban.› Ontuma mbatulaajo on wi'i mo: ‹Joodo kisan, yettaa kaydi maa ndin, windaa ko cappande jowi joganidaa mo.›

⁷ «O wi'i goddo goo kadi: ‹An-le ko jelu joganidaa mo?› On jaabii: ‹Ko bootooji teemedere ngawri.› O wi'i ondon kadi: ‹Yettu kaydi maa ndin, windaa ko bootooji cappande jeetati joganidaa mo.›

⁸ «Onsay jom on mbatulaajo boyliido manti mo sabu kon ko on golliri yoyre. Ko fii faybe nguu jamaanu no yoyi telen nokondoobe mun ben buri faybe jeyaaße ben ka ndaygu. ⁹ Min-le mi wi'ay on: yo on dabbir dee jawle adunayankeeje yibbe, fii tuma nde den lanniroyi on, yo on wernoye ka galleepi poomayankeeji.

¹⁰ «Mo nundii e hoore ko fandi, o nunday e hoore ko mawni. Awa kadi mo nundaali e hoore ko fandi, o nundataa e hoore ko mawni. ¹¹ Si tawii non on nundaali e hoore jawle adunayankeeje den, haray ko hombo halfinoyta on jawle haqiqaaaje den? ¹² Awa kadi si on nundaali e hoore ngel goddo ngel, ko hombo jonnoyta on ko mon kon?

¹³ «Golloowo hay gooto waawataa gollande jeybe dun dido, ko fii o apay oya, o yida oya, maa o habboo e oya, o itta bote e oya. Ko dun wadi si on waawataa rewude Alla, rewon jawdi.»

¹⁴ Fariisiyaabe* ben e yisude mun kaalisi no hedotonoo d'un fow liba bote e lisa. ¹⁵ O wi'i be: «Onon hidon wadi hoore mon feewube e yeeso yimbe ben, kono Allaahu on kajun no andi ko woni ka berde mon. Ko fii ko yimbe ben banti fii mun kon ko piddudun yeeso Alla.

¹⁶ «Awa ko Sariya on e defte annabaabe ben wonnoo haa fewndo Yaayaa. Kono gila e fewndo Yaayaa, Kibaaru Mooyo fii *laamu Alla ngun no fejnneede, mo kala no huutorde doole fii naatugol d'on. ¹⁷ Kono mi andinii on: kammu ngun e leydi ndin mutude no buri newaade edii ciifun gootun wonkun ka Sariya monteede.

¹⁸ «Kala accitudo beyngu mun, yetti goddo goo, haray ontigi jeenii. Awa kadi kala yettudo debbo seedaado, haray ondon kadi jeenii.

Fii Galo Baaso e Baaso Galo

¹⁹ «Hari no woodunoo aaden galoo bornotonoodo conci dimi firsiniraadi ko wojji, wadaynoodo jande woo welii e fotii. ²⁰ Tawi miskiino wi'eteedo Laazaru mo bandu mun fow temmaa no waalii ka dambugal makko. ²¹ On no faaletenoo hendaade jaameteeji luttaynoodi din ka on galoo. Tawi hay bareeji din arayno metta den temmeeje makko.

²² «Nande goo on miskiino maayi, malaa'ikaabe ben nabi mo tawtinoyi Ibraahiima. On galoo kadi maayi, surraa. ²³ Ka jahannama, tawi on galoo no e nder lette, o banti gite, o haynii Laazaru takko Ibraahiima ka wodditi. ²⁴ O ewnii, o wi'i: ‹Baaba an Ibraahiima, yurme lan, yamiraa Laazaru yo o jullu hondu makko

ndun ka ndiyan, o ara o bubbyinanammi denngal an ngal. Ko fii mido tampi ka yiite gaa!»

²⁵ «Ibraahiima jaabii mo, wi'i: «Boobo an, anditu an a hendiroke moyyereeji maa cfin ka aduna, wano non kadi Laazaru yedinoke ton tampereiji. Jooni non kanko bernde makko buttinaama doo, an hida tampude. ²⁶ E hoore dun kadi, wimbo moolanaango no wadaa hakkunde men fii wota faalaabe iwde gaa yaha ton ben waawu dfun, wano non onon kadi wota on waawu lumbitirde gaa.»

²⁷ «Onsay on galo wi'i: «Awa mi torike ma yo baaba an, nelanan Laazaru ka galle ben an ²⁸ haa e bee neene-gootoobe an njowo, o hajoyoo be cfun fii wota kambe kadi be aroy e ndee nokkuure lette.»

²⁹ «Onsay Ibraahiima jaabii mo, wi'i: «Hibe jogii ton deftere Muusaa nden e defte beya annabaabe, yo be hedo dsen.»

³⁰ «O wi'i: «Oo'o, yo baaba an Ibraahiima, kono si goddo e maybe ben yahii e maabbe, be tuubay.»

³¹ «Kono Ibraahiima wi'i mo: «Si be hedfaaki Muusaa e annabaabe heddiibe ben, haray be jabataa wurteede hay si be immintinanaama goddo e maybe ben!» »

17

Fii Junuubu e Gomfinal e Farilla (Mat. 18.6-7; Mrk. 9.42)

¹ Iisaa wi'i taalibaabe mun ben: «Alaa no peggal ronkirta arirde, kono bone wonanii on wondo sabu dun. ² Haray ko buri mo moyyande

ko kolmbireede tuntere hayre, o bugee ka baharu edii o wonude sabu gokkun e koy paykoy feggaade. ³ Reenee hoore mon!

«Si musiddo mon oonike, waajee mo. Si o tuubii, yaafee mo. ⁴ Awa kadi si o bonnii on laabi jeedidi e nder jallal, o yilitoyike e mon laabi jeedidi hara himo wi'a: ‹mi tuubii›, on yaafoto mo.»

⁵ Sahaabaabe* ben wi'i Koohoojo on: «Beydanee men gomdfinal.»

⁶ Onsay Koohoojo on wi'i be: «Hay si tawii gomdfinal mon ngal no fota e abbere bene, harayno on waaway yamirde kii ndologahi, wi'on: ‹Boro, iroyodaa ka tumbo baharu!›, onsay ki doftoto on.

⁷ «Hara ko hombo e mon, si no mari kurkaadu-
uj o remoowo maa ngaynaako, wi'ata on no o
iwtiri golle: ‹Aru jaamaa? ⁸ Kono ka liddu
dun, o wi'ay mo: ‹Moyyinan an ko mi jaama,
bornodaa si bannanaa mi. Si mi gaynii jaamude
yara, onsay an kadi a jaamay yaraa. ⁹ Hara
o mantay on kurkaadu-
uj fii o wadii ko o
yamiraa kon? ¹⁰ Onon kadi wano non, si on
wadii ko yamiradon kon fow, wi'ee: ‹Menen ko
men kurkaadu-
ube meereebe, ko ko men haani
wadude tun men wadi.› »

Fii Yimbe Sappo be Damajan Nangi

¹¹ E nder yaadu makko ndun Yerusalaam,
kanko Iisaa o rewri hakkunde diiwal *Samariiya
ngal e diiwal Jaliilu ngal. ¹² Wa fewndo ko o
naataynood e hodo, yimbe sappo be damajan
nangi sutii fottugol e makko, be dartii ka

woddi, ¹³ be ewnii, be wi'i: «Iisaa, ko onon yo Karamoko'en! Yurminee men!»

¹⁴ Bay o yi'ii be, o wi'i be: «Yahee hollitoyodon *yottinoobe sadaka ben.»

E nder yaadu mabbe ndun be tawi be sellinaama, be laabii. ¹⁵ Bay goddo e mabbe tawii sellinaama, o yiltitii e hoore himo ewnoo manta Alla. ¹⁶ Hawri on neddo ko Samariyankeejo. O ari, o yani e ley koyde Iisaa, o weltanii mo.

¹⁷ Onsay Iisaa yetti haala kan, wi'i: «Hinaa be sappoo non be sellinaama, be laabii? Awa ko honto njeenayoobe luttube ben woni? ¹⁸ Hinaa hay gooto e mabbe yiltitaaki fii mantugol Alla si wonaa oo janano doo tun?» ¹⁹ Onsay o wi'i on: «Immo yahaa, gomdinal maa ngal hisinii ma.»

*Maandeeji Fii Arugol Laamu Alla ngun
(Mat. 24.23-28, 37-41)*

²⁰ Nande goo *Fariisiyaabe ben landii mo kanko Iisaa ko honde tuma *laamu Alla ngun arata. Iisaa jaabii be, wi'i: «Laamu Alla ngun aradataa no yi'orta. ²¹ Wi'etaake ‹hingu doo!› maa cfun ‹hingu daa!›, ko fii mi andinii on, laamu Alla ngun no e mon.»

²² Onsay o wi'i taalibaabe makko ben: «Saa'i aroyay nde faaletedon yi'ude wootere e jalaade *Bii-Aaden on, kono on yi'oystaa nde. ²³ On wi'oyte ‹himo doo!› maa ‹himo daa!› Wota on hammir ton, wota on dogir ton. ²⁴ Awa ko wano mayannde mayirta non, jalba gila nano haa e jaamo ka weeyo, ko wano non ardu Bii-Aaden on wonirotya ka jalaande mun. ²⁵ Kono doo e

dun, bee o tampa fota, nguu jamaanu doo hawka mo.

*Fii Hebulanagol Saa'i Artoygol Bii-Aaden on
(Mat. 24.37-41)*

²⁶ «Ko wadunoo kon fewndo jamaanu Nuuhu, wadoyay kadi ka nalaade ado artugol Bii-Aaden on. ²⁷ Ko fii fewndo Nuuhu, hari yimbe ben no jaamaynood yara, no jomba jombanee, haa jande Nuuhu naatunoo ka laana. Onsay waamere nden ari, muli luttube ben fow.

²⁸ «Ko wano non kadi e fewndo jamaanu Luutu, yimbe ben no jaamaynood yara, sooda soodita, tuta darna. ²⁹ Kono nde Luutu yaltunoo *Saduumma, mbollan yiite iwrung ka kammu yani e mabbe, muli be fow.

³⁰ «Ko wano non kadi woniroyna jande Bii-Aaden on feeniti. ³¹ Nden jande, on wondo ka fowtorde hoore suudu mun wota tippano piiji mun wondi din ka nder suudu. Wano non kadi on wondo ka ngesa wota yiltito ka mun. ³² Anditee fii sonnaajo Luutu on. ³³ Kala dabbudo no dandira ngurndan mun, dan hayri-ray mo, kono kala non mo ngurndan mun hayrinaa, o dandoyay dan.

³⁴ «Mi andinii on kadi, e nden jemmaare don, yimbe dido waalodube e danki wooti, goddo e mabbe yettete, oya on lutta. ³⁵ Wano non kadi, rewbe dido wonbe unidude, goddo e mabbe yettete, oya on lutta. ³⁶ Awa kadi yimbe dido wondube e ngesa woota, gooto e mabbe yettete, oya on lutta.»

³⁷ Taalibaabe ben wi'i mo: «Koohoojo amen, hara ko honto dun wadoyta?»

O jaabii be, o wi'i: «Ko ka ko maayi kon woni woo, jigaaje ñen moobotoo.»

18

Misal Yettaangal e Naawoowo Boyliido

¹ Iisaa wadani taalibaabe mun ben ngal misal fii banginangol be nafa duumagol e toraare Alla, hara be haabaali. ² O wi'i be: «No woodunoo e saare aaden naawoowo mo hulataa Alla, awa kadi o hersataa hay gooto. ³ Tawi kadi no e nden saare keynguujo araynoodo soono woo ka on naawoowo, wi'a mo: ‹Naawu hakkunde an e oo gajno an.› ⁴ Gila neebii hari on naawoowo anniyaaki. Kono bawto dñun o wi'itii: ‹Fii kala mi hulataa Alla, awa kadi mi hersataa hay gooto, ⁵ bay oo keynguujo sonjirii lan nii, yo mi naawan mo fii wota o sonjan nande woo!› »

⁶ Koohoojo on wi'i: «On nanii ko on naawoowo boyliido wi'i kon? ⁷ E taw si hara Allaahu on naawantaa ben be o subii, dñun ko ben torotoobe mo jemma e nalorma? Hara o nennanay be dñun? ⁸ Mi andinii on, o naawanay be ko yaawi. Kono taw nde *Bii-Aaden on aroyi si o tawoyay gomdinbe e hoore ndii leydi?»

Fii Hakkunde Fariisiyaajo on e Yantoowo Sagalle on

⁹ O wadi kadi ngal misal doo e hoore ben yimbe fellitube ko feewube, hara hibe aybina beya, ¹⁰ o wi'i be: «Yimbe dñido yahuno ka *juulirde mawnde fii juulugol, tawi goddo on ko *Fariisiyaajo, oya on ko yantoowo sagalle.

¹¹ Fariisiyaajo on immii darii, tawi himo tororanaynoo nii hoore makko, wi'a: «Eyoo-maa Alla, mi weltanike ma ko tawi kon mi wa'aa wa heddiibe ben, d'un ko bee jattoobe maa bee boyliibe maa bee jeenoobe maa wano oo yantoowo sagalle doo. ¹² Min-le mi hooray laabi didi e nder yontere nden, awa kadi mi ittay sappabun e hoore kala ko mi hebi.»

¹³ «Tawi on yantoowo sagalle hay suusataano bantirde gite mun den ka kammu, kono himo darii ka woddfitii, himo tappitoo e bernde, wi'a: «Yaa an Alla, yurminan min oo junuubankeej!»

¹⁴ «Mi andinii on, ko on yantoowo sagalle don-le yiltitinoo ka galle mun e hoore ko o jogoraado wa feewudo edii Fariisiyaajo on. Ko fii kala mawnintiniido jippinoyte, awa kadi kala jippindo hoore mun mawninoyte.»

Fii Hakkunde Iisaa e Paykoy koy

(Mat. 19.13-15; Mrk. 10.13-16)

¹⁵ Wobbe addanayno mo hay booboobe ben fii yo o meemu be. Nde taalibaabe ben yi'unoo d'un, be tonjani be. ¹⁶ Kono Iisaa nodditi paykoy koy e hoore himo wi'a: «Accee paykoy koy ara e an, wota on hadu koy, ko fii *laamu Alla ngun ko sifa makkoy wonani. ¹⁷ Ka haqiqiqa mi andinii on, kala mo jabiraali laamu Alla ngun wa paykun, haray o naatataa ton few.»

Fii Hooreejo Aldudo on

(Mat. 19.16-30; Mrk. 10.17-31)

¹⁸ Hooreejo goo landii Iisaa, wi'i: «Karamokoojo moyyo, hara ko hondun mi

haani wadude fii yo mi heboy *ngurndan
poomayankejan dan?»

¹⁹ Onsay Iisaa jaabii mo, wi'i: «Ko fii hondun
wi'irtaa mi moyyo? Hay gooto moyyaa si hinaa
Alla Bajjo on. ²⁰ Hida andi yamirooje d'en, d'un
ko wota a jeenu, wota a ittu hoore, wota a wuju,
wota a seedito fenaande, teddinaa kadi yumma
maa e ben maa.»^u

²¹ On hooreejo jaabii, wi'i: «Mido wadude d'un
fow gila e cukankaaku an.»

²² Bay Iisaa nanii ko on wi'i kon, o wi'i
mo: «No njakkan-maa fahin huunde wootere:
yeeyitu kala ko jeydaa, senditanaa miskinbe ben,
dun wonanoyte keyee ka kammuuli, onsay araa
jokkaa mi.»

²³ Bay on nanii d'un, o aani, ko fii hari himo
aldi fota. ²⁴ Bay Iisaa yi'ii d'un e makko, o wi'i:
«Emba no sattani jom jawle en ka be naata ka
laamu Alla. ²⁵ No buri weebande ngelooba ka
mba rewa e wuddere meselal edii ka jom jawle
en naata ka laamu Alla.»

²⁶ Wonnoobe mo hedaaade ben wi'i: «E hara ko
hombo dandoytee?»

²⁷ Iisaa jaabii be, wi'i: «Ko waawantaako
nedfanke kon no waawanoo Alla.»

²⁸ Onsay Petruusu wi'i mo: «Awa e hino, men
accii ko men jeyi kon fow, men jokkii on.»

²⁹ Iisaa jaabii be, wi'i: «Ka haqiiqa mi andinii
on, kala accudo suudu mun ndun e beyngu mun
e sibbe mun ben e mawbe mun ben e bibbe mun
ben sabu laamu Alla ngun, ³⁰ o heboyay ko buri

dun ka aduna doo, awa kadi ka aduna aroyoowo,
o heboyay ngurndan poomayankejan d'an.»

*Fii ko Saatii Heboyde Iisaa kon
(Mat. 20.17-19; Mrk. 10.32-34)*

³¹ Onsay Iisaa pottini *sahaabaabe mun ben sappoo e dido sera, o wi'i be: «Awa hiden yahude Yerusalem. Kala ko annabaabe ben windunoo kon e hoore Bii-Aaden on laatoyto.

³² O wattoyte e juude be wonaa Yahuudiyanke ben, o jalee, o tiwee, tuttee e hoore makko, be piyira mo cabbi, be wara. ³³ Bawto dun o immitoo ka nalaande tammere.»

³⁴ Kono ben taalibaabe faamaali hay fus e d'un, din kongudi wirnanii be, be ronki faamude kon ko yewtaa.

*Fii no Iisaa Wuntiniri Bundo Yeerikoo
(Mat. 20.29-34; Mrk. 10.46-52)*

³⁵ Ko Iisaa badii Yeerikoo, tawi bundo no joodii ka sera laawol no toroo. ³⁶ On nani hito jamaa on ko feyyata kon, o landii ko hondun wadi. ³⁷ O andinaa wonde ko Iisaa oo jeyaado Naasirata woni feyyude. ³⁸ Onsay o ewnii, o wi'i: «Ko an yo Iisaa, bii Daawuuda, yurminan!»

³⁹ Hikkinoobe yeeso ben feli mo fii yo o fanku, kono o burti ewnaade, wi'a: «Ko an yo bii Daawuuda, yurminan!»

⁴⁰ Onsay Iisaa dartii, o yamiri yo be addan mo mo. Bay on badike, Iisaa landii mo: ⁴¹ «Ko hondun faaladaa yo mi wadane?»

On jaabii mo, wi'i: «Koohoojo, ko yo mi hettu giide an d'en!»

⁴² Onsay Iisaa jaabii mo, wi'i: «Wuntu, gomdfinal maa ngal hisinii ma.» ⁴³ O wunti d'on kisan, o jokki Iisaa, himo mawnina Alla. Bay jamaa on yi'ii d'un, be woni e mantugol Alla.

19

Fii Gomdfinal Zaakaru ngal

¹ Iisaa naati Yeerikoo. Ko o tayitata saare nden, ² tawi aaden galo tawaado e hooreebe yantoobe sagalle ben wi'eteedo Zaakaru ³ no humpanoo yi'ugol mo kanko Iisaa. Kono o ronki feere mun sabu duudugol jamaa on, awa kadi himo rabbidi. ⁴ Onsay o dogi o feyyi yeeso, o yawoyi e hoore yibbehi fii no o yi'ira Iisaa, bay hari on ko d'on rewata.

⁵ Nde Iisaa hewtunoo e ley kin yibbehi, o tiggiti, o wi'i: «Zaakaru, tippo heja, ko fii bee mi weera hande ka galle maa.» ⁶ Zaakaru tippii heja, jaabii mo e nder weltaare.

⁷ Bay fow yi'ii d'un, be njeni, be wi'i: «Oo kodoyike junuubankeejo!»

⁸ Kono Zaakaru immii darii, wi'i Koohoojo on: «Hedee yo Koohoojo an, mi okkay miskinbe ben feccere jawdi an ndin. Awa kadi si mido bonnani goddo goddun, mi yobitiray ontigi d'un cowalle nay.»

⁹ Onsay Iisaa wi'i: «Hande kisiyee naatii e dee galle doo. Ko fii oo doo kadi ko o iwdi Ibraahiima. ¹⁰ Awa ko addi *Bii-Aaden on ko dabbitugol majube ben, danda be.»

*Misal Yettaangal e Manankun
(Mat. 25.14-30)*

¹¹ Bay hari o badike Yerusalaam, o beyditani
be ngal misal doo, ko fii hari hedinoobe mo ben
no sikka *laamu Alla ngun feepay kisan. ¹² O
wi'i be: «Aaden dimo yahuno e leydi woddfundi
fii lamminoyegol, arta. ¹³ On noddi kurkaaduube
mun sappo, o jonne be manankunji sappo. O wi'i
be: «Gollitiree dii doo haa mi ara.»

¹⁴ Kono tawi yimbe leydi makko ndin no api
mo. Be nelti wobbe baawo makko fii andingol
ben ton wonde be faalaaka ondon laamoo be.

¹⁵ «Bay o lamminoyaama, o artii, o nodditi
kurkaaduube makko be o jonnunoo mbuudi ben
fii no o andira ko honno mo bee e maabbe
gollitiriri di.

¹⁶ «Arano on e maabbe ari, wi'i: «Koohoojo an,
di accirnodon mi din beydike cowalle sappo.»
¹⁷ O wi'i mo: «A wadii ko moyyi, yo kurkaaduuo
moyyo! Ko fii a nundii e hoore ko fandii, mi
wadii ma yeesoojo e hoore ca'e sappo.»

¹⁸ «Dimmo on e maabbe ari, wi'i: «Koohoojo an,
di accirnodon mi din beydike cowalle jowi.» ¹⁹ O
wi'i ondon kadi: «Mi wadii ma e hoore ca'e jowi.»

²⁰ «Goddo e maabbe kadi ari, wi'i: «Koohoojo
an, e hino di accirnodaa mi din, hari mido mari
di e lincun. ²¹ Ko fii hari mido hulu maa, bay ko
a jaafudo. A yettay ko a wallinaa, awa kadi a
sojitatay ko a aawaa.»

²² «Onsay on lando wi'i mo: «Mi jaawitirte
kongudi maa din, yo jiyaado bondo! Hida an-
dunoo ko mi aaden jaafudo? Maa mi yettay ko
mi wallinaa, maa mi sojitatay ko mi aawaa? ²³ Fii
hondun non a wallinaali di e juude gollitiroobe

di ben,w dun, nde mi artunoo woo, mi hettayno
di e hoore tono.»

²⁴ «Ontuma kanko lando on o wi'i wonnoobe don ben: ‹Jabitee di e juude makko, jonnor di oo jogiido manankunji sappo.› ²⁵ Kono be wi'i mo: ‹Koohoojo amen, ondon no jogii manankunji sappo!› ²⁶ O jaabii be, o wi'i: ‹Mi andinii on, ko mardo beydantee, kono mo maraa on jabitante hay yero ko o mari kon. ²⁷ Dun-le wurin addanee lan doo aybe an ben, ben be faalanooka mi laamoo dun, waron be yeeso an doo.› »

Fii Naatugol Iisaa Yerusalaam

(Mat. 21.1-11; Mrk. 11.1-10; Yhn. 12.12-19)

²⁸ Bay kanko Iisaa o gaynii yewtude dun, o hikkii yeeso, o yaari Yerusalaam. ²⁹ Bay wonii o badike Bayti-Faazii e *Betanii, dun ko takko Fello *Zaytuuni ngon, o nuli taalibaabe makko dido, ³⁰ o wi'i be: «Yahee e ngoo hodo wongo yeeso mon doo. No naatirdon e maggo, on taway mbabun kun godso wadsaaki haa hande no humii son. Hunton kun, addon. ³¹ Si godso aru on e landaade, wi'a: ‹Ko hondun huntandson kun?›, on wi'ay mo: ‹Ko haaju Koohoojo on yani e makkun.› »

³² Nelaabe ben yahi be tawroyi no be wiiranoo non. ³³ Ko be huntata kun, jeybe mbabun kun ben wi'i be: «Ko hondun wondson kun huntande?»

³⁴ Be jaabii, be wi'i: «Ko haaju Koohoojo on yani e makkun.»

W 19:23 19.23 Wallingol mbuudi e «juude gollitiroowo di on» no firi wallingol di ka «banki.»

³⁵ Be addani kun Iisaa, be ndaddani mo conci mabbe din e hoore makkun si be yawni mo. ³⁶ No o yaaraynoo non, yimbe ben no ndadfsirande mo non conci mun din ka laawol.

³⁷ Nde tawnoo o badike Yerusalaam ka tippagol Fello Zaytuuni, dental taalibaabe ben fow sowti weltaare, be woni e ewnagol manta Alla, sabu dii kaawakeeji moyyi di be yi'i. ³⁸ Tawi hibe wi'a:
«Yo barki wonan oo lando

wondo arude e innde Joomiraado on.y
Yo buttu wonu ka kammu,
darja burdoo toowude wonanii ma!»

³⁹ Wobbe e *Fariisiyaabe tawaabe e mbatu ngun ben wi'i mo kanko Iisaa: «Karamoko'en, yamiree taalibaabe mon ben yo be fanku!»

⁴⁰ O jaabii be, o wi'i: «Mi andinii on, si kambe be fankii, kaaye den sowtay!»

⁴¹ Bay be badike saare Yerusalaam nden, nde Iisaa haynornoo nde, o fesi fii mayre, ⁴² o wi'i: «Si an kadi hifa andunoo hande ko wonanayno-

maa buttu, kono jooni cun wirnanike ma.

⁴³ Aroyay e palaade nde aybe maa ben ari hunditu-maa hurgi, bittire cende fow. ⁴⁴ Be lancete, be lancide e kala hodudo e maa. Be accataa e maa hay kaayun e hoore hayre, sabu a anditaali saa'i mo Alla hoddiri faabagol ma on.»

Fii no Iisaa Radori Yeeyoobe ben ka Juulirde Mawnde

(Mat. 21.12-17; Mrk. 11.15-19; Yhn. 2.13-16)

⁴⁵ O naati ka dingiral *juulirde mawnde, o woni e radfagol wonnoobe yeeyude ton ben,

⁴⁶ hara himo wi'ora be: «No windii: <Suudu an

ndun ko suudu torordu Alla,»Y kono onon on wattii ndu fammeere wuybe!»Z

⁴⁷ Tawi kanko Iisaa jande woo o jannayno ka juulirde mawnde. Kono hooreebe *yottinoobe sadaka ben e jannoobe fii Sariya on ben e lambe jamaa on no dabbaynood no sahinbinira mo. ⁴⁸ Kono hari be andaa ko honno be gerdara, sabu hari jamaa on fow no tudi noppa mun e makko.

20

*Lande fii Bawgal Iisaa ngal
(Mat. 21.23-27; Mrk. 11.27-33)*

¹ E nder d'en balde d'on, tawi Iisaa no waajaade jamaa on ka *juulirde mawnde, d'un-le ko fejnangol be Kibaaru Mooyo on. Onsay hooreebe *yottinoobe sadaka ben e jannoobe fii Sariya on ben wondude e mawbe ben ari, ² wi'i mo: «Wowlan men ko e ley kongol hombo wondaa wadude d'un e ko e ley kongol hombo wondaa?»

³ O jaabii be, o wi'i: «Min kadi mi landoto on huunde wootere, jaabodon mi. ⁴ E hara lootugol ko Yaaya lootaynood yimbe ben kon, ko ka arsi iwri kaa ko e nedfanke?»

⁵ Kono ben woni e wi'indirgol: «Si en jaabike mo ko ka arsi iwri, o wi'ay en ko hondun hadunoo gomfinen mo? ⁶ Si en jaabike mo-le ko e nedfanke d'un iwri, jamaa on fow fiday en kaaye, sabu hibe felliti Yaaya ko annabaajo.» ⁷ Onsay be jaabii mo, be wi'i: «Men andaa ka ngol lootugol don iwri.»

⁸ Onsay Iisaa wi'i be: «Min kadi mi wowlantaa on ko e ley kongol hombo mi woni wadfirde d'un.»

*Misal Yettaangal e Fariisiyaabe ben
(Mat. 21.33-46; Mrk. 12.1-12)*

⁹ Ontuma o fewtiti jamaa on, o wadani be ngal misal doo, o wi'i be: «Goddō tutuno *wiiju, o halfini tutateeri ndin remooobe wiiju ben, o yahi safaari ka o neeboya. ¹⁰ Bay saa'i sojitungol wiiju on hewtii, o immini kurkaadu makko haa e remooobe wiiju ben fii yo ben jonnan mo bibbe wiiju gebal makko ngal. Kono ben piyi on, be immintini mo juude mehe. ¹¹ O immini kurkaadu makko goo kadi, be piyi ondon kadi, be hersini, be immintini mo juude mehe. ¹² O immini tammo kadi, be barmini ondon kadi, be radii.

¹³ «Jom tutateeri ndin wi'i: ‹Ko hondun mi wadata jooni? Yo mi immin biddo an yidaado on, no gasa ka be teddinoya ondon.› ¹⁴ Kono no ben remooobe wiiju haynornoo mo, be wi'indiri: ‹Ko oo woni ronoowo on, waren mo fii yo ndondi ndin wontan en!› ¹⁵ Onsay be nabi mo ka baawo tutateeri, be wari.»

Iisaa wi'i kadi: «Jooni non, hara ko hondun jom ndin tutateeri wiiju wadata ben? ¹⁶ On aray, re'a ben remooobe wiiju, o halfina ndi wobbe goo.»

Bay ben hedfinoobe mo kanko Iisaa nanii d'un, be wi'i: «Wota d'un wonir non!»

¹⁷ E nder ko o tenyinta be kon, kanko Iisaa, o wi'i: «Hara ko hondun koo ko windii firi: ‹Hayre nde mahoobe ben hawkunoo nden

wontii hittunde ka sobbundu»^a
 18 «Awa kala yanudo e nden hayre, o lancoto,
 kala kadi mo nde yani e hoore mun, o
 muncoto.»^b
 19 Bay hooreebe yottinoobe sadaka ben e jan-
 noobe fii Sariya on ben faamii wonde ko e hoore
 mabbe Iisaa wadi ngal misal, tawi hibe daabbude
 no be fawira juude e makko don kisan, kono hari
 hibe huli jamaa on.

Fii no Iisaa Ndardoraa fii Yobugol Sagalle
(Mat. 22.15-22; Mrk. 12.13-17)

20 Be woni e aynugol Iisaa, be immini e makko
 tefoobe bonbe waditiibe ko feewube fii ko nan-
 gira mo kongudi makko din, watta mo e juude
 laamu ngun e ley kongol lamminaafdo diiwal
 ngal. 21 Ben landii mo, wi'i: «Karamoko'en,
 meden andi hidon jannude waajoo no feewiri,
 awa kadi on burdindinaa yimbe ben, hidon
 jannirde laawol Alla ngol goonga. 22 E hara no
 haani ka men yoba lando mawdo Roomu on
 sagalle kaa haanaa?»

23 Kono bay Iisaa faamii janfa mabbe kan, o
 jaabii be, o wi'i: 24 «Hollee lan *dinaruuru. Ko
 nandolla hombo e bindi hombo woni e mayru?»

Be jaabii: «Ko lando mawdo Roomu on.»

25 Onsay o jaabii be, o wi'i: «Jonnitee lando
 mawdo Roomu on ko makko kon, jonniton Alla
 kadi ko mun kon.»

26 Be ronki hebude feere no be nangira mo e
 din kongudi makko yeeso jamaa on, kono bay be
 ηaldidii e ngol jaabawol makko, be deyyi.

a 20:17 20.17 Zab. 118.22

b 20:18 20.18 Isa. 8.14-15

*Fii Sadduusiyaabe ben e Ummatal ngal
(Mat. 22.23-33; Mrk. 12.18-27)*

²⁷ Wobbe e bee *Sadduusiyaabe, wi'ube wonde ummutal alaa ben, ari landii Iisaa, be wi'i mo:
²⁸ «Karamoko'en, e hino ko Muusaa wi'i men kon: Si goddo maayii accii beyngu e baawo bidso, haray mijnpiraawo on maydo no haani yettude on keynguujo mo o acci fii no o hebirana on kotiraawo makko jurriya. ²⁹ Tawa non no woodi bibbe njeedido. Arano on jombii, maayii, hebaali bidso. ³⁰ Dimmo on kadi yettii mo, maayii. ³¹ Tammo on kadi wano non. Dun yaarii non haa ben njeedido non be timmi, be accaali jurriya. ³² Bawto d'un debbo on kadi maayii. ³³ Bay hari ben njeedidoo non resii on debbo, ko hombo e ben on debbo wontanoyta ka ummutal?»

³⁴ Iisaa jaabii ße, wi'i: «Faybe nguu jamaanu doo tiggay tiggete. ³⁵ Kono ben yedoyaabe immintineede e hakkunde maybe ben e tawegol e nguu jamaanu aroyayngu, resoytaa, resetaake. ³⁶ Awa kadi be maayitoytaa, ko fii haray hibe wa'i wa malaa'ikaabe. Ko ße faybe Alla kadi, bay ko be bibbe ummutal ngal. ³⁷ Seedee maybe ben immitoto, ko d'un Muusaa banginnoo ka o wowli don fii pitahun kun fewndo o noddi Joomiraado on, on Alla Ibraahiima e Alla Issaaqa e Alla Yaaquuba.c ³⁸ Awa Alla wonaa Alla maybe ben, kono ko o Alla wurbe ben, bay fii makko kanko, ben fow ko wurbe.»

³⁹ Wobbe e jannoobe fii Sariya on ben wi'i mo: «Karamoko'en, on yewtii haqqiqa.» ⁴⁰ Bawto

dun be suusaali mo landaade hay huunde.

*Fii Hakkunde Almasiihu on e Daawuuda
(Mat. 22.41-46; Mrk. 12.35-37)*

⁴¹ Iisaa wi'i ße: «Ko honno wi'iraan
wonde *Almasiihu on ko jurriya Daawuuda?

⁴²⁻⁴³ Daawuuda tigi no holli ka Zabuura wonde:
Joomiraado on daalani Joomi an on:

Joodor ka sengo an jaamo
haa mi wada aybe maa ben ka ley teppe
maa.^d

⁴⁴ «Daawuuda tigi wi'ii Almasiihu on ‹Joomi›,
haray ko honno non Almasiihu on woniri jurriya
makko?»

⁴⁵ Fewndo ka yimbe ßen fow hedii mo dñon,
o wi'i taalibaabe makko ßen: ⁴⁶ «Reenee e
bee jannoobe fii Sariya on, dun ko bee yidube
jindidugol e dolokkaaji njani, yidi hiwreede ka
fottirde, yidi saffawol aranol ngol ka juulirdse,
yidi ndadfsule arane ñen ka nafagol. ⁴⁷ Hibe jatta
galleeji keynguuße, hibe juutina julde maßbe
fii yiingo, awa ßen heboyay jaawooje burde
sattude.»

21

*Fii Sadaka mo Keynguujo on Itti on
(Mrk. 12.41-44)*

¹ Onsay Iisaa ßanti gite mun ñen, o yi'i alduße
no itta sadakaaji, watta ka nder arkawal sadaka.

² O yi'i kadi keynguujo baaso no liba ton tamma-
hoy ðidoy. ³ Onsay o wi'i: «Mido haalande on
goonga, oo keynguujo baaso no buri beya fow

d **20:42-43** 20.42-43. Zab. 110.1

ko ittaa. ⁴ Ko fii beya fow ko ko burtani d'fun kon
be wadi, kono kanko keynguujo on e waasidude,
ko ko o mari kon fow fii ko o wuurira o wadoyi
ton.»

*Maandeeji fii Artoygol Iisaa Almasiihu on
(Mat. 24:1-2; Mrk. 13:1-2)*

⁵ Nde tawnoo wobbe no yewta fii *juulirde
mawnde nden e kon ko nde fotiniraa kaaye
labaade e piiji ittaadi sadaka, onsay Iisaa wi'i be:
⁶ «Nalaade no ara nde tawata koo ko yi'oton d'oo
fow lancaama, hay hayre e hoore hayre luttoytaa
d'oo.»

⁷ Onsay be landii mo, be wi'i: «Karamoko'en,
ko honde tuma d'fun wadoyta e ko hondun
wonoyta maande laatagol d'fun?»

⁸ Iisaa jaabii be, wi'i: «Reenee e faljineede,
ko fii buy aroyay baarora innde an nden hara
no wi'a ko kapun woni *Almasiihu on, saa'i on
badike. Wota on jokkoy ben. ⁹ Awa kadi nde
nanoydon fii hareeji e murtaldu woo, haray wota
on hulu. Ko fii ko d'fun haani adaade wadude,
kono lannoode nden hinaa d'on kisan.»

¹⁰ O wi'i be kadi: «Hareeji wadoyay hakkunde
leyyi din. Laamateeriji din kadi immondi-
rana. ¹¹ Awa kadi dimbande leydi tiifude wada,
heege e nabbeeli raabooji wada e nokkeeli goo,
kaawakeeji hulbiniidi wada, maandeeji njani
kadi wada ka kammu.

¹² «Kono d'oo e d'fun, be faway on juude, be
cukkoo on, be naboyay on ka juulirde, be bugoo
on ka kasoo, be ardoon haa e lambe ben e
yeesoobe diiwe den sabu innde an nden. ¹³ Kono
d'fun wonanoyay on sabu no seeditoron. ¹⁴ Fibee

ka berde mon wonde on hebulotaako jaabagol ko liddeteson kon. ¹⁵ Ko fii mi okkoyay on faamu, mi longina on kongudi haa ka tawata aybe mon ben waawataa dartaade on maa yedda. ¹⁶ Awa hay mawbe mon ben e neene-gootoobe mon ben e sibbe mon ben e yibbe mon ben wadoyay on e joge be wona sabu wobbe e mon waree. ¹⁷ Fow anoyay on sabu innde an nden. ¹⁸ Kono cukulol hoore mon hay gootol majjoytaa. ¹⁹ Kono si on ηanjike, haray on hiwii wonkiiji mon din.

²⁰ «Nde yi'udon koneeli din daakanike saare Yerusalaam nden haa hunditii woo, haray andee lancagol mayre badike. ²¹ Onsay yo hodube ka diwal Yahuuda ben dogir ka pelle, yo wonbe ka nder saare Yerusalaam ben kadi yaltu. Wota wonbe ka fulawaa ben kadi aru ka saare. ²² Ko fii den wonoyay nalaade yottande fii laatingol kala ko windinoo. ²³ E nder den balde don, bone wonanay sowiibe ben e muyninaybe ben. Ko fii annde tiifunde waday e leydi ndin, tikkere yana e hoore oo jamaa. ²⁴ Be libiroyee mbelndi kaafa, be nabee, be maccindinanoyoo leyde den fow. Be wonaa Yahuudiyanke ben yaabitaa Yerusalaam haa saa'iiji di be happenaa din timma.

²⁵ «Awa kadi maandeeji wadoyay ka naange e ka lewru e ka koode. Jamaaji din maapoo ka hoore leydi haa be jiboo ko be wadfa sabu uumaango ndiyan dan ka baharu e ko dan piyondirta kon. ²⁶ Yimbe ben fadfee kulol e nder ko be mijotoo fii ko aroyta ka hoore leydi kon, ko tiidi kon ka kammu kadi dimboyoo.» ²⁷ Ontuma non *Bii-Aaden on yi'oyte, no ara e

duulere, hara himo arda e bawgal e mangural mawngal. ²⁸ Nde dfun fuddii wadude woo, haray bantee townon ko'e mon den, ko fii haray kisiyee mon on badike.»

²⁹ Onsay o wadani be ngal misal dfoo, o wi'i be: «Ndaaree kii yibbehi maa ledde goo. ³⁰ No de wilitiri, on andanay hoore mon wonde setto ngon badike. ³¹ Ko wano non kadi, no yiirudson dii piiji no wada woo, haray andee wonde *laamu Alla ngun badike. ³² Ka haqiiqa mi andinii on, dfun fow waday ado nguu jamaanu feyyude. ³³ Kammu ngun e leydi ndin feyyay, kono min kongudi an dñin feyyataa.

³⁴ «Reenee hoore mon fii wota berde mon den heewu anndeiji aduna maa faale jaamugol yara haa betoo, haa nde ndee palaande mawnde juhirta on wa pircol. ³⁵ Ko fii nde hewtay e hoore kala wondo e ndelo oo aduna. ³⁶ Findinee hakkillaaji mon dñin saa'i woo saa'i, torodon fii no hebiron doole dadugol dñin piiji wadoyaydñi, e fii no daroroyodon yeeso Bii-Aaden on.»

³⁷ Tawi e nder nalle dñen, Iisaa waajotono ka juulirde mawnde, o waaloya jemma e hoore ngoo fello wi'eteengoo *Zaytuuni. ³⁸ Jamaa on fow dawrayno ka juulirde mawnde fii hedagol mo kanko Iisaa.

22

Fii no Iisaa Janforaa

(Mat. 26.1-5; Mrk. 14.1-2; Yhn. 11.45-53)

¹ Hari *Juldeere Bireedi de Aldaa e Lewen nden badike, nden no wi'ee kadi *Juldeere Yawtaneede.^d ² Tawi hooreebe *yottinoobe sadaka ben e jannoobe fii Sariya on ben no dabbaynood feere no be mulira Iisaa, kono tawi hibe huli jamaa on. ³ Onsay Ibuliisa naati e bernde Yudaasi, dun ko oo jammaado Iskariiyu, on ko awadaa e *sahaabaabe Iisaa ben sappoo e dido. ⁴ On yahi yewtidoyi e hooreebe yottinoobe sadaka ben wondude e halfinaabe aynugol *juulirde mawnde nden fii no o wattira Iisaa e juudse mabbe. ⁵ Ben weltori dun, be haldi yeenugol mo kaalisi. ⁶ O jabi dun, o woni e dabbugol feere no o wattira Iisaa e juudse mabbe, hara jamaa on hoyfaali.

*Fii Nafakka Juldeere Yawtaneede nden
(Mat. 26.17-29; Mrk. 14.12-26; Yhn. 13.21-30)*

⁷ Bay nalaande Juldeere Bireedi de Aldaa e Lewen nden hewtii, dun ko nalaande hirsanteende baalun nden, ⁸ onsay Iisaa immini Petrusu e Yuuhanna, o wi'i be: «Yahee moyyinanon en nafakka fii ko nafoden ka juldeere.»

⁹ Ben wi'i mo: «Ko honto faaladon yo men moyyinanoy en dun?»

¹⁰ Onsay o wi'i be: «No naatirdon ka saare, on fottay e gorko rontiido loonde ndiyan. On jokkay mo haa e suudu ndu o naati e mun woo. ¹¹ Onsay on wi'ay jom suudu ndun: ‹Karamoko'en wi'ii men yo men lando

^d 22:1 22.1 Egg. 12

on: Ko e suudu hondu be nafodata e taalibaabe ma  e ben nafakka Juldeere Yawtaneede nden?» ¹² Ontuma o hollay on konkooru njanndu weyyitaandu ka koore dow. Ko d  n moyyinton.»

¹³ Be yahi be tawroyi no o haalirannoo be non, be moyyini nafakka juldeere nden.

¹⁴ Bay saa'i on hewtii, Iisaa badii fii nafagol wondude e sahaabaabe be o toddinoo ben sappoo e d  ido. ¹⁵ Onsay o wi'i be: «Mido faalanoo fota hawtidugol e mon oo nafakka ado mi tampude. ¹⁶ Ko fii mi andinii on, mi jaamitataa oo nafakka ndee juldeere hande kadi haa nde laatoyoo ka *laamateeri Alla.»

¹⁷ Onsay o yetti jardukun wadforkun njaram, o jarni Alla, o wi'i: «Jabee kun jardukun njaram, senditon hakkunde mon. ¹⁸ Ko fii mi andinii on, mi yaritataa hande kadi njaram bibbe wiipu haa tuma laamateeri Alla ndin ari.»

¹⁹ Bawto d  un o yetti kadi bireedi, o jarni Alla, o tayiti, o jonni be, o wi'i: «Dundoo ko bandu an ndu okkadon ndun nii, waddee d  undoo maande ko anditiron fii an.»

²⁰ Ko wano non kadi, bay be gaynii jaamude, o yetti jardukun wadforkun njaram, o wi'i: «Kun jardukun ko maande fii *ahadi heyri tippundi e dan yiyan an hibboyteedan fii mon. ²¹ Kono non janfotoodo lan on no jaamidude e an. ²² Bii-Aaden* on no yahude wano muuyiranoo non, kono bone wonanii on janfotoodo mo!»

²³ Onsay be woni e landondirgol, wi'a: «Hara ko hombo e men wadoyta d  un?»

*Fii Yedeteebe Laamu ben ka Laamateeri Alla
(Mat. 20.25-28; Mrk. 10.42-45)*

²⁴ Yeddondiral wadi hakkunde maßbe fii andugol ko hombo e maßbe gasata wonude mawđo. ²⁵ Onsay Iisaa wi'i be: «Lambe diya leyyi no laamori di doole, ben laamiibe no wi'aa wadoobe ko moyyi. ²⁶ Kono onon, wota on wa'u wa ben. Burdo teddude on e mon, yo wa'u wa suka. Awa kadi lando on, yo wa'u wa kurkaadu. ²⁷ Hara ko hombo buri teddude hakkunde wondo nafaade on e wondo bannude nafakka on? Hinaa wondo nafaade on? Minle non, mido woniri hakkunde mon wa on bannoowo. ²⁸ Onon-le, ko onon wondunoo e an e nder dii tampereeji an fow. ²⁹ Ko dfun wadi si mi lamminiray on wano Baaba an lamminirimmi non, ³⁰ fii no jaamiroyon yaron ka ndadđudi an, dfun ko ka nder laamateeri an, joofodfon kadi ka julle laamu fii laamoyagol *bolondaaji Isra'iila din sappoo e didi.»

³¹ Onsay Iisaa wi'i: «Sim'uunu, Sim'uunu! Ibuliisa torike hendagol on, wesira wa nendi. ³² Kono min mi toranike ma fii wota gomdfinal maa ngal hayru. An kadi tuma yiltitidaa e an eto tabintinaa wondibbe maa ben.»

³³ Onsay Sim'uunu Petruusu jaabii mo, wi'i: «Koohoojo, mido hebulanii yaadugol e maa haa e kasoo maa haa e mayde.»

³⁴ Onsay Iisaa jaabii mo, wi'i: «Petruusu, mi andinii ma, ndonto yoggataa hande hara a yeddaali wonde hida andimmi haa timma laabi tati.»

35 O wi'i be kadi: «Fewndo ko mi neli on e baawo mbuudi e bonfo e padé, on ñakkiroyano ton goddfun?»

Be jaabitii: «Hay huunde.»

36 O wi'i be kadi: «Jooni non ko nii: Kala jogiido mbuudi yo yettu, wano non kadi on mo no mari bonfo yo yettu, awa kadi mo maraa kaafa e mon yo yeeyitu waramba mun on sooda.

37 Awa mi andinii on, bee ko windii fii an kon laatoo, wonde: «O wattidete e wadoobe bone ßen.»e Wano non kadi, kala ko windanoo fii an kon ko e laataade woni.»

38 Onsay be wi'i mo: «Koohoojo, e hino doo kaafaaje didi.»

O wi'i be: «Awa yonii.»

Fii no Iisaa Torori Alla ka wi'etee don Jatsay-maani

(Mat. 26.36-46; Mrk. 14.32-42)

39 Ontuma o yalti o yahi ka Fello *Zaytuuni wano o woowiri non. Taalibaabe makko ben kadi jokki mo. **40** Bay be hewtii e nden nokkuure, o wi'i be: «Toree Alla fii wota on naatu e jarrabi.»

41 Onsay o woddfitori be yeru bugannde hayre, o jicci o torii, **42** o wi'i: «Baaba an, si hidfa faalaa, yo kun jardukun tampere pottito lan. Kono non wota faale an on wadu, kono yo faale maa on wadu.» **43** Onsay malaa'ikaajo iwri ka kammu, ari e makko no tiifina mo. **44** Bay sonjaa wonkii hebii mo, o burti toragol. Onsay lakkere makko nden wa'i wa cinte yiiyan de no sinte e leydi.

45 Bay o gaynii toragol, o immii o yahi ka taalibaabe makko ben woni ton, o tawi hibe

daanii sabu annde nde be wondi nden. ⁴⁶ Onsay o wi'i be: «Ko fii hondun daanantodon? Immee torodon fii wota on naatu e jarrabi.»

Fii no Iisaa Nangiraa

(Mat. 26.47-56; Mrk. 14.43-50; Yhn. 18.3-12)

⁴⁷ E nder ko o yewtata kon, hawrondiri jamaa yimbe hewtii. Tawi ko oo wi'eteedo Yudaasi tawdaado e sappoo e difoobe ben ardi ben. On badii Iisaa fii lunnagol mo. ⁴⁸ Onsay Iisaa wi'i mo: «Yudaasi, hara ko lunnagol janfortaa Bii-Aaden on?»

⁴⁹ Bay wondibbe Iisaa ben sogitike ko saatii wadude kon, onsay be wi'i: «Koohoojo, hara yo men huutor kaafaaje amen den?» ⁵⁰ Tun goddo e mabbe soppi kurkaadu yottinoowo mawdo sadaka on, o itti mo nowru jaamuru ndun.

⁵¹ Kono Iisaa yetti haala kan, wi'i: «Hattinee doo!» Onsay o meemi nowru on ndun, ndu wattii.

⁵² Iisaa wi'i ben arbe hendagol mo kadi, d'un ko hooreebe yottinoobe sadaka ben e hooreebe aynoobe juulirde mawnde nden e mawbe ben: «Hidon ardi e kaafaaje e bedi wa si ko ngujjo arandon. ⁵³ Hara-le nande woo mido wondi e mon ka juulirde mawnde, kono on fawaali juude e an. Kono doo ko saa'i mon nii, e saa'i mbawdi nibe den.»

Fii no Petruusu Yeddiri fii Iisaa

(Mat. 26.69-75; Mrk. 14.66-72; Yhn. 18.15-18, 25-27)

⁵⁴ Bay wonii be nangii Iisaa, be nabi mo ka galla yottinoowo mawdo sadaka on. Petruusu iwtiri baawo mabbe ka wodditii. ⁵⁵ Onsay

be hubbi yiite ka hakkunde tandem, be joodii. Petruusu kadi ari joododi e mabbe. ⁵⁶ No debbo kurkaadujo goo yiirunoo mo kanko Petruusu himo joodii ka binde yiite, kanko debbo on o tenyini mo, o wi'i: «Oo doo ko wondiddo Iisaa!»

⁵⁷ Kono kanko Petruusu o yeddi, o wi'i: «Hey ko an yo debbo, min mi andaa oo.»

⁵⁸ Bay nettii seeda, goddo goo kadi yi'i mo, wi'i: «An ko a tawdaado e mabbe.»

Petruusu wi'i ondon kadi: «Mi tawdaaka e mabbe!»

⁵⁹ Bay wonii embere saa'i gooto feyyii, goddo goo kadi catii, wi'i: «Pellet, oo ko wondiddo makko nii, ko fii oo ko mo Jaliilu.»

⁶⁰ Petruusu jaabii ondon kadi, wi'i: «An mi andaa ko hondun wondaa wowlude!» Wa fewndo o wowlata dfun, ndontoori ndin yoggi. ⁶¹ Onsay Koohoojo on yeyyitii, cikki gite mun den e Petruusu. Tun Petruusu anditi fii ko Koohoojo on wowlannoo mo kon wondema: «Ado ndonto yoggude hande, haray a yeddii fii an haa timmii laabi tati!» ⁶² Onsay Petruusu yalti ka yaasi, o wulli wullaandu sattundu.

⁶³ Tawi yimbe joginoobe Iisaa ben no jalaynoo mo luuboo, ⁶⁴ awa kadi be buumayno mo yeeso ngon, be wi'a: «Hotto ko hombo luubi-maa!» ⁶⁵ E hoore dfun be kongayno mo, be hoyna.

*Fii no Iisaa Nabiraa Yeeso Mawbe Jamaa on
(Mat. 26.59-68; Mrk. 14.55-64; Yhn. 18.19-24)*

⁶⁶ Bay weetii, mawbe jamaa on, dfun ko hooreebe yottinoobe sadaka ben e jannoobe fii Sariya on ben, mottondiri. Be addi Iisaa ka yeeso

dental mabbe, ⁶⁷ be wi'i mo: «Si tawii ko an woni *Almasiihu on, wowlan men.»

Iisaa jaabii be, wi'i: «Si mi haalanii on, on hoolotaako, ⁶⁸ awa kadi si mi landike on, on jaabotaako lan. ⁶⁹ Kono gila jooni Bii-Aaden on joodoto ka sengo jaamo Allaahu on, on Jom Bawgal.»

⁷⁰ Be fow be wi'i: «Kere ko an woni *Biddo Alla on?»

Ontuma o wi'i be: «Ko ko wowludon kon onon tigi, ko mi dfun.»

⁷¹ Onsay be wi'i: «Ko seedee hombo faaladsen kadi? Kanko tigi o wowlii, en nanii!»

23

*Fii no Iisaa Addiraa Yeeso Lambe Diiwe den
(Mat. 27.1-2, 11-26; Mrk. 15.1-15; Yhn. 18.28-40)*

¹ Onsay dental ngal fow immii nabi Iisaa ka Pilaatu. ² Be woni e toojugol mo, wi'a: «Men taw oo no murtinde jamaa men on hada be yobugol lando mawdo Roomu on sagalle. Awa kadi himo wi'itii *Almasiihu, dfun ko lando.»

³ Pilaatu landii mo, wi'i: «Hara ko an woni lando Yahuudiyanke'en?»

Iisaa jaabii mo, wi'i: «Ko wano wi'irdfaa non.»

⁴ Onsay Pilaatu wi'i hooreebe *yottinoobe sadaka ben e jamaa on: «Mi yi'aali hujja woo ko oo neddo jogoree!»

⁵ Kono be catii e dfun, be wi'i: «Himo lowirde jamaa on jannugol be. O fudsii gila ka diiwal Jaliilu, o rewi e diiwal Yahuuda ngal fow haa o hewtii doo jooni.»

⁶ Bay Pilaatu nanii d'un, o landii si oo neddo ko mo Jaliilu. ⁷ Bay kanko Pilaatu o andii wonde Iisaa ko e laamateeri *Heroodu ndin jeyaa, o feyyini mo ka Heroodu. Tawi e den balde don, on no Yerusalaam.

⁸ Bay Heroodu yi'ii Iisaa, d'un weltini mo fota. Tawi gila neebi himo faalanoo mo yi'ude sabu ko o nanaynood no wowlee fii makko kon. Awa kadi himo faalanoo yi'ude himo wada kaawakeeji moyyi goo. ⁹ O landii mo haa juuti, kono Iisaa jaabaaki mo fus.

¹⁰ Tawi hooreebe yottinoobe sadaka ben wondude e jannoobe fii Sariya on ben no don, ben no toopa mo toope sattude. ¹¹ Heroodu e suufaabbe mun ben kadi jali mo aybini. Onsay o borni mo dolokke fotudo, o nattani mo Pilaatu. ¹² Nden jande tigi Pilaatu e Heroodu ben ayrunoobe welditi.

¹³ Ontuma Pilaatu nodditi hooreebe yottinoobe sadaka ben e yeesoobe ben wondude e jamaa on, ¹⁴ o wi'i be: «On addanii lan oo neddo, on wi'ii ko kanko woni murtinde jamaa on. E hino mi landike mo e tawnde mon, mi yi'aali dalil woo e hoore oo neddo ko toopiron mo. ¹⁵ Awa Heroodu kadi-le wano non, ko fii o artiranii en mo. Awa-le oo neddo wadfaa hay huunde ko foddi e wareede. ¹⁶ Jooni mi donkinay mo, mi accita.»

¹⁷ Tawi no farlii mo kanko Pilaatu, juldeere bee accitangol be nangaado goo. ¹⁸ Onsay be fow be sonki, be wi'i: «Waree oo doo! Accitanon men Barabaasi!» (¹⁹ Tawi on-le ko sokiraa, ko sabu gere no wadunoo ka saare e waru hoore.)

20 Pilaatu yewti be fahin, bay hari no e fondo makko accitugol Iisaa. **21** Kono hibe sonkaynood, wi'a: «Fempee mo! Fempee mo!»

22 Pilaatu wi'i be tammun: «Hara ko hondun oo bonni? Min mi yi'aali dalil woo ko oo wariree. Jooni mi donkinay mo, mi accita.»

23 Kono be catii e dñun e hoore sonko njano, hibe toroo yo o fempe. Ngon sonko mabbe fooli mo kanko Pilaatu. **24** Pilaatu jabani be faale mabbe on. **25** O acciti on mo be torii mo fii mun, dñun ko oo sokiranoodo fii gere e waru hoore, o wadi Iisaa faale mabbe on.

Fii no Iisaa Wariraa

(Mat. 27.32-44; Mrk. 15.21-32; Yhn. 19.17-27)

26 Fewndo be nabaynood Iisaa fii warugol mo, be hendii godfo mo Sirenii iwaynoodo ngesa, on no wi'ee Sim'uunu. Be rondi mo *leggal altindiraangal ngal, o iwtiri baawo Iisaa. **27** Tawi jamaa moolanaado no iwtiri baawo makko wondude e rewbe, ben no wulla fesa fii makko kanko Iisaa. **28** Onsay Iisaa fewtiti be, wi'i: «Ko onon yo rewbe Yerusalaam, wota on wullu fii an, kono wullee fii mon e fii bibbe mon ben. **29** Ko fii nalaadse no aroya ka wi'oytee: ‹Maloore wonanii ben be jiidotako e ben be hebaali bibbe e ben be muyninaali!› **30** Onsay yimbe ben wi'oyay: ‹Pelle yanee e hoore amen! Cehe suumee men!› **31** Hara si ledse kecce den warraama nii, haray ko honno yorde den warroytee?»

32 Tawi bonbe dido no nabideede e Iisaa fii waridoyegol e makko. **33** Bay be hewtii e ndee nokkuure wi'eteende Laalagal Hoore, be fempi mo don wondude e ben bonbe dido, goddo on

ka sengo makko jaamo, oya on ka nano makko.
34 Onsay Iisaa wi'i: «Baaba an, yaafó bee, ko fii
 be andaa koo ko be woni wadude.» Onsay ben
 suufaaabe sendiri conci makko dfin urbaaf.

35 Tawi yimbe ben no darii don no ndaara.
 Yeesoobe ben kajun no awmotonoo mo, wi'a: «O
 dandii beya, awa yo o dandu hoore makko kadi
 si tawii ko kanko woni Almasiihu Alla, Subaado
 on!»

36 Suufaaabe ben kajun kadi no jalaynood
 mo, be badii bannangol mo ndiyan lammudan,
37 hibe wi'a: «Si tawii ko an woni Lando
 Yahuudiyanke'en, dandito an tigi!»

38 Tawi no windii dow makko wonde: «Oo doo
 ko Lando Yahuudiyanke'en nii.»

39 Tawi bondo mo o fempidaa wengaa goo no
 hoynaynood mo, wi'a: «Wonaa an woni Almasiihu
 on? Awa dandu goy hoore maa, dandaa men
 menen kadi!»

40 Kono dimmo makko on feli mo, wi'i: «An
 a hulataa Alla? An oo yagginiraado wa makko,
41 enen d'ido-le hidien foddi e d'sun, ko fii ko kuude
 men hettuden. Kono oo doo wadaali hay fus ko
 boni.»

42 Onsay o wi'iti kadi: «Iisaa, anditoyee fii an
 tuma artoydon ka laamu mon.»

43 Iisaa jaabii mo, wi'i: «Mi holnii ma won-
 dema hande tigi a wonday e an ka aljanna.»

Fii Mayde Iisaa nden

(Mat. 27.45-56; Mrk. 15.33-41; Yhn. 19.25-30)

44 Bay wonii naange e hoore, niwre wadi e
 leydi ndin fow haa ka baawo fanaa. **45** Naange

ngen weji, *wirngallo hormorde nden ka *juulirde mawnde feeri e hakkunde. ⁴⁶ Iisaa ewnii ko tiidi, o wi'i: «Baaba an, mi wattii ruuhu an on e juude maa.» No o gaynirnoo wi'ude d'un, o timmi.

⁴⁷ Bay hooreejo suufaaabe ben yi'ii kon ko wadi d'on, o mawnini Alla, o wi'i: «Ka haqiiqa, hari oo neddo ko feewudo.»

⁴⁸ Bay jamaa arnoobe yi'ugol ko wadaynoodon kon yi'ii d'un, be yilititii hibe tappitoo e berde. ⁴⁹ Tawi kala andunoobe mo kanko Iisaa, wondude e rewbe iwtirnoobe baawo makko ben gila Jaliilu, no darii ka wod'sitii, no ndaara kon ko woni wadude.

Fii no Iisaa Surriaa

(Mat. 27.57-61; Mrk. 15.42-47; Yhn. 19.38-42)

⁵⁰ Tawi neddo moyyo feewudo wi'eteedo Yuusufu no tawanoo e ngal dental mawbe *Banii-Isra'iila'en ben, ⁵¹ on kajun jabaano taweede e fewjoore mabbe nden e den kuude mabbe. Hari on ko jeyaado e ndee saare Yahuudiyankeebi wi'eteende Raamati, tawi on ko *laamu Alla ngun tijjii. ⁵² On yahi ka Pilaatu, o torii mo hettugol furee Iisaa on. ⁵³ Bawto d'un, o yahi, o tippini furee Iisaa on ka hoore leggal, o tumbi e kasannge, o belnoyi mo e qaburu asaado e feto, mo hari hay gooto surraaka e mun. ⁵⁴ Dun hawri nande hebulanagol *nalaande fowteteende nden, bay hari nden badike ka naata. ⁵⁵ Rewbe ardunoobe e Iisaa ben gila Jaliilu jokki Yuusufu, be yi'oyi yenaande nden e no furee on belniraa. ⁵⁶ Onsay rewbe ben

yiltitii fii moyyinoygol tiiri e angiri. No asewe on naatirnoo, be fowtii wano Sariya on wi'iri non.

24

*Fii Wurniteede Iisaa Almasiihu on
(Mat. 28.1-10; Mrk. 16.1-8; Yhn. 20.1-10)*

¹ E alat, d'un ko jallal aranal e nder yontere nden, ben rewbe dawi bimbi subaka ka yenaande, hibe yoobii tiiri ndi be moyyinnoo.
² Be tawi hayre ombiranoonde yenaande nden tallaama, ³ be naati, kono be tawaali ton furee Iisaa Koohoojo on. ⁴ Wa fewndo ko be mjjotoo fii d'un, worbe dido borniibe conci jalbudi, feepani be. ⁵ Be fow be huli, be ugginii ka leydi. Kono ben worbe dido wi'i be: «Ko fii hondun d'abbitanton wurdo on e hakkunde maybe ben? ⁶ O alaa doo, o immintinaama. Anditee ko o wowlanaynood on kon fewndo o wonnood Jaliilu, ⁷ himo wi'aynood on: ‹Bee *Bii-Aaden on wattee e juude junuubanke'en, o fempee, o waree, o immintinoyee ka nalaande tammere.› » ⁸ Tun, ben anditi din kongudi Iisaa Almasiihu on.

⁹ Onsay be iwi ka yenaande d'on, be yahi yeetoyagol d'un *sahaabaabe ben sappoo e go'o wondude e heddiibe ben fow. ¹⁰ Ben rewbe ko Mariyama Magaduuna e Yuwanna e Mariyama yumma Yaaquuba wondude e wobbe goo, wowlanaynood d'un sahaabaabe ben sappoo e go'o. ¹¹ Kono be ronki hoolaade ben rewbe, tawi kongudi ben din no wa'ani be wa fuyanteeji. ¹² Kono Petruusu immii dogiri ton. Bay o hewtii, o ugginii ka yenaande, ko kasannge on

tun o yi'i ton. Onsay o hooti ka makko e hoore himo ɳaldfi sabu kon ko wadi.

*Fii Taalibaabe ben Dido ka Laawol Emayusu
(Mrk. 16.12-13)*

¹³ Tawi nden nande tigi dido e maßbe no ya-haynoo e hodo no wi'ee Emayusu woddfitorngo Yerusalaam embere kilomeeterji sappoo e didi.

¹⁴ Tawi ben no yewta fii ko wadfunoo kon fow.

¹⁵ Wa fewndo ko be yewtata d'un be landondira, Iisaa badii be, o waddi e maßbe laawol. ¹⁶ Kono tawi giide mabbe den no wirnanaa anditugol mo.

¹⁷ Onsay o wi'i be: «Ko kongudi hondi wondon bugondirde e nder nduu yaadu mon?»

Be dartii, be yoomi. ¹⁸ Onsay goddo e maßbe wi'eteedo Keleyopaasu jaabii mo, wi'i: «Haray ko an tun woni kodo wondo Yerusalaam mo andaali ko wadi kon e dee balde doo?»

¹⁹ Onsay o wi'i be: «Hondun?»

Be wi'i mo: «Koo ko wadi e hoore Iisaa oo jeyaado Naasirata, d'un ko oo annabaajo jom kuugal e kongol yeeso Alla e yeeso jamaa on fow, ²⁰ e ko honno kadi hooreebe *yottinoobe sadaka men ben e hooreebe men ben wattiri mo e juude beya fii yo ben naawu mo, be fempa mo e leggal, be wara. ²¹ Meden tanyininoo ko kanko yaltinayno *Banii-Isra'iila'en e njaggu. Kono e nder d'un fow, e hino hebii hande balde tati gila d'un wadi. ²² Awa kadi rewbe wondibbe amen goo ɳaldfinii men foto, nde be dawunoo ka yenaande, ²³ be tawaali ton furee makko on. Be ari be wi'i men malaa'ikaabe feenani be, ben wi'ii be wonde kanko Iisaa himo wuuri. ²⁴ Onsay

wondibbe amen goo kadi yahi ka yenaande, be tawaali furee Iisaa on ton, tawi ko no rewbe ben wirunoo men non tigi woniri!»

25 Onsay kanko Iisaa o wi'i be: «Ko onon yo njofoobe, hidon nennanii gomdingol kala ko annabaabe ben *hiitino kon! **26** Hara haananaa *Almasiihu on ka o tampira nii ado o naatude ka mangural makko?» **27** Onsay o nangi sifanagol be ko windii fii makko kon fow ka defte, gila e Muusaa e beya annabaabe fow.

28 Bay wonii be badike hodo ngo be yahaynoo e mun ngon, o faaminani be wonde ko toonin ton o sutii. **29** Kono be jeeji mo, be wi'i: «Wonen, ko fii naange ngen yoroyii, nibbay woni.» Onsay o naatidi e mabbe.

30 Fewndo o joosodi e mabbe fii jaamugol, o yetti bireedi on, o du'ii, o tayiti, o jonni be. **31** Tun, giide mabbe den udditii, be anditi mo, onsay o majjitori be. **32** Be woni e wi'indirgol: «Hinaa berde men den no amaynoo weltaare fewndo ko o yewtata en ka laawol, o sifanoo en ko windii kon ka defte?»

33 Be immii kisan, be yiltitii Yerusalem, be ari be tawi sahaabaabe ben sappoo e go'o e wondibbe mun ben no mottondiri d'on. **34** Tawi ben wonnoobe d'on no wi'a: «Ka haqiqaa, Koohoojo on immintinaama, o feenaii Sim'uunu!»^g **35** Onsay beya dido kadi sifanii be ko be yi'i kon ka laawol e ko honno be anditiri mo ka sendo bireedi.

^g **24:34** 24.34 Ko Sim'uunu oo dfoo woni jammaado Petruusu.

Fii no Iisaa Feepirani Sahaabaabe ben

(Mat. 28.16-20; Mrk. 16.14-18; Yhn. 20.19-23)

³⁶ Wa fewndo ko be yewtaynoodun, kanko tigi o ari hakkunde maßbe, o wi'i be: «Yo jam wonu e mon!»

³⁷ Tun be d'enyii, be huli, be sikki ko mbeelu be yi'i. ³⁸ Kono o wi'i be: «Ko hondun jibidon? Ko fii hondun kadi ndee sikkitaare wonani ka berde mon? ³⁹ Ndaaree dee juude an e dee koyde an. Ko min tigi nii! Meemee lan, ndaaron, ko fii mbeelu alaa teewu, alaa yi'e, on yi'ii-le min mido mari.»

⁴⁰ Bay wonii o wi'ii d'un, onsay o holli be juude makko d'en e koyde makko d'en. ⁴¹ Bay tawii e nder weltaare maßbe nden haa jooni be hoolaaki, hibe e nder ḥalaw, onsay o wi'i be: «Hara hidon mari d'oo godfun ko jaametee?» ⁴² Onsay be bannani mo hunttere lingii sa'aangii. ⁴³ O yetti ngii, o nafii yeeso maßbe.

⁴⁴ Onsay o wi'i be: «Ko d'fundoo mi wowlannoo on fewndo mi wondunoo e mon, wonde bee ko windii fii an kon fow ka Sariya Muusaa e ka Zabuura e ka defte beya annabaabe laatoo.»

⁴⁵ Ontuma o udditani be hakkille maßbe d'en fii no be faamira defte d'en. ⁴⁶ O wi'i be kadi: «Ko d'fundoo windii wondema Almasiihu on tampay, o immintinee e hakkunde maybe ben ka nallal tammal. ⁴⁷ Awa kadi leyyi din fow waajete e innde makko gila Yerusalem fii yo be tuubu, be yaafanee junuubaaji maßbe d'in. ⁴⁸ Ko onon woni seedeobe d'un ben. ⁴⁹ Jooni non mi addanoyay on ko Baaba an fodunoo kon. Kono onon luttee ka nder saare, haa tuma yedafon bawgal iwrayngal ka dow ngal.»

*Fii Yentineede Iisaa Almasiihu on
(Mrk. 16.19-20; Sah. 1.9-11)*

⁵⁰ Bawto d'un Iisaa nawri be telen *Betanii,
o fonti juude makko den, o du'anii be. ⁵¹ Wa
fewndo ko o du'antoo be, o acci be don, o
yentinaa ka kammu. ⁵² Bay kambe be suj-
janii mo, be yilitpii Yerusalaam e hoore welo-
welo mawngo. ⁵³ Onsay be tabiti ka *juulirde
mawnde, hibe mawnina Alla.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6